

# कोरिन्थीरालाई

## पावलए उसंक्ताव परींद ओरायो चिथी

आव चिथी कोरिन्थलाव मन्दलीए जूनी पावलए ओसरो ज़। नो पो अखैया खन्दलाव बनै उमिन थासो सहर ओल्यो। नल प्राईनिकाव मिर दुप्सिहुद यामन लागिउ येन ज़ यादोज़्याव। परमेस्वरए उमिनतावराए मनी निताव माचाव येनर दाद (१ कोरिन्थी ५:१-६:२०), भन या याल माखैद इंसिउ ज़ लिज़्यार दी लिन्या पावलए ओथैज़्याव (१:११; ३:३)। है जैद नोर बलेस्त्र्या लिद ननी जोगोइन्त्याए जूनी नोरालाई सिडार्द (४:१४-१७), मन्दली कितावनी चलैन्त्या लिद (११:२-१४:४०) परमेस्वरए उमिनत पाथ ओरापारैव सरै:सिउ लिज़्या।

१ परमेस्वरए ओखतैनाव येसु ख्रीसए ओसाची डा पावल स़ोनो डास लिज़्याव गेभाइ सोस्थेनेसस गिन्ल्योनी, २ जे कोरिन्थलाव परमेस्वरए ओमन्दलीलाई आव चिथी परींद गिन्त्याचिज़्या। जे प्राइंडाव गेप्रभु येसु ख्रीसए उमिन हाइज़्यावरास जे ब येसु ख्रीसनिकाव छैव तान्या खुल्सिउर जेलिज़्या। ३ परमेस्वर गेबाबु स़ोनो गेप्रभु येसु ख्रीसनी जेल्योदा नियुँ गराँद जेयुँ होलाँ जैद ओयाचिरक।

### परमेस्वरलाई धन्याबाद

४ जे येसु ख्रीसनिकाव परमेस्वरए ओअसिकर जेदैवए डा जेजूनी परमेस्वरलाई एकमन्या धन्याबाद चरै:व ज़ डानैज़्या। ५ जे पाँल तादी ब, ग्यानल तादी ब ख्रीसनी प्राइंनी ज़ बनिउर ताद जेले। ६ ननी ज़ जेलाई गेसथैचिउ ख्रीसए ओपाँर जे जेक्याँत थ०रिके। ७ है जैद ज़ गेप्रभु येसु ख्रीस ओमाहुवा पै जेयुँ थू जैद कींद

जेनैज्याव भरिल, ओल ओयेन दान्यात प्राईं बरदानर जोरैद नैदयाचिउ, कातानी ब कम्ती जेमाले। ८ है जैद गेप्रभु येसु ख्रीस उहुन्या छ्याम पै ओल परमेस्वरए ज़ जेलाई थोरिउर जेखत माल्योर नैचिरिज्याव। ९ निताव येनल परमेस्वरलाई युं हुबो ज़ लिज्या। ओज़ा गेप्रभु येसु ख्रीसस सिप लिन्या खुल्द नैचिउ।

### माखैन्या पाँ

१० अ डानैं डामें, गेप्रभु येसु ख्रीसए उमिननी डाअर्थैचिज्या, जे जेल सु ज़ माखैव ताताक, बुरू प्राईं तयुं जैद खैद लिच्यो। ११ खाली आड ते भन जे इंसिउ ज़ जेलिज्या दी लिन्या क्लोयए उक्किमलावराए ल्योनी डाथैके। १२ डा है डालिज्याव आव ज़, ख्वाराए 'गे पावलसकावर', ख्वाराए 'गे अपोल्लोससकावर', ख्वाराए 'गे पत्रुससकावर', ख्वाराए 'गे ख्रीससकावर' है जेलिज्या दी। १३ काता ख्रीस चिरासिउ उलिज्याव रो? सैं डा पावल कुसत तङ्गैसिद डाजिउ भाःद डयाचिउ रो? सैं डा डामिनत सछैंसिउर ब यालिज्याव रो? १४ परमेस्वरलाई धन्याबाद लिज्या, जे जेल्योडाव डानिसछैवनी क्रिस्पस

सोनो गायसनी वाज़ लिज्यानी। नो नेब्लोकिन छुतर डामारासछैवए, १५ डा डामिनत गेसछैंसिके लिन्या सुए ज़ है ल्यो दैन्या जेमाले। १६ ओहो, स्तिफनासए उक्किमलावरालाई पाला डारासछैव ज़। नोकिन छुतर ते डामारासछैखेहो लिन्या मिताव डाडम्सिज्या। १७ ख्रीसए डालाई मिँर सछैँन्याए जूनी उपरीनाव माःक, चाव था सथैन्याए जूनी उपरीनाव ची। नो पाँ डारासथैक येसु ख्रीस कुसत उसिउ पाँ ओअर्थ तामाक लिद बनै मोहोन्यालो जैद डामापाँए, किताव उलिज्याव हिताव ज़ डापाँज्या।

### ख्रीस उसिउ ओलेखा ल्यो ज़

१८ ख्रीस कुसत उसिउ पाँ नर्गलाव येमदा बाज्यावरालाई ओलेखा माल्यो पाँ मिताव ज़ लिज्या। खाली गे अजम्बरी जुनीदा बाज्यावरालाई ते नो पाँत परमेस्वरए ओसक्ती लिज्या। १९ काराव ल्यो ताकिन धर्मसास्त्रल इताव सर्सिउ लिज्या,

“बनै सैन्याराए यापाँ

ओअर्थ माल्यो

अनाकलाव ज़ डाजैरिज्या।

ओगहक ल्यो मिँए ओगहक ब

पलतैद डाएरिज्या।”

२० यागहक ल्योर खैकी? सास्त्रीर सोनो आव जुकलाव सैन्यार काड्डु यालिङ्याव? ओल परमेस्वरए ज़ आव मानुवातावराए याबुद्धी अनाकलाव ज़ जैद याएक्यो। २१ परमेस्वरए डादाकिन ज़ अचम्बलाव ओगोडैनी आव मानुवाताव मिँरालाई या याबुद्धीनी यागहकनी ओललाई मासरेस्थुन्या याजैक्यो। बुरू गे गेरासथैङ्याव आव मानुवाताव मिँराए ओअर्थ माल्यो याथःरैव पाँनी ज़ भन यायुँ हुप्ज़्यावरालाई परमेस्वरए अजम्बरी जुनी यान्या थःरैक्यो। २२ यहूदीराए ते परमेस्वरए ओराज्यालाव सरेसर आव मानुवात यामारँःवा पै यायुँ ओमाहुप्ज़्याव। ग्रीकराए फरी बुद्धीलाव पाँ याखिम्ज़्याव। २३ गे ते खीस कुसत उसिउ पाँ गेरासथैङ्या। नो पाँए यहूदीरालाई यायुँ केःद याएङ्याव, ग्रीकरालाई फरी ओअर्थ माल्यो ल०न्या मिताव पाँ ज़ लिङ्या। २४ परमेस्वरए ओराछाँतिउरालाई ते, यहूदीर तादी ब, ग्रीकर तादी ब, खीसए ओक्याँत परमेस्वरए ओसक्ती ब लिङ्या, उबुद्धी ब लिङ्या। २५ काराव ल्यो ताकिन परमेस्वरए ओयेन मुर्ख मिताव औरैःदी ब मिँराए

यागहकनी यादोङ्याव येनकिन ओलेखा ल्यो लिङ्या। नत ओसक्ती माल्यो हाङ्या मिताव ओजैसिदी ब मिँराए यासाँकिन परमेस्वरए ओसक्ती नत ज़ रैःके।

### परमेस्वरए ज़िम्ज़ारालाई ओराछाँतिउ

२६ जे ब जेसैङ्या डानैँ डामेर, जे परमेस्वरए उखुल्चिउ बेलाक मिँराए लेखानी जेबुद्धी ल्योर कोसै जेमाले, घेप्पा मिँर ब कोसै जेमाले, घेप्पा जातलावर ब कोसै जेमाले। २७ ननी ज़ रैःङ्या, परमेस्वरए आव मानुवाताव बनै सैन्याराए यागहक अनाकलाव जैदयान्याए जूँनी जे मिताव कान्ल ज़ मागनिसिउरालाई रूजिचिक्यो। घेप्पा मिन दैवरालाई लाज मोर्नो जैन्याए जूँनी जे मिताव ज़िम्ज़ारालाई छाँतिचिक्यो। २८ आव मानुवाताव यासघ्योःव पाँर अनाकलाव जैन्याए जूँनी परमेस्वरए भन ज़िम्ज़ा, काम मालागिउ सोनो कान्ल ज़ मागनिसिउरालाई यारूजिक्यो। २९ है जैद परमेस्वरए ओडाक यानी सु ज़ सघ्योःसिधुन्या मालेर। ३० जे ब परमेस्वरनी वाज़ येसु खीसस सिप ताद जेले। नोए ज़ परमेस्वरलाई

सरेस्न्या बुद्धी ब यासिक्यो, ओल  
उयुंलाव मिताव छैंवर ब जैसिक्यो,  
माचावनी रें:द उमीर ब जैसिक्यो।  
३१ है जैद धर्मसास्त्रल सर्सिउ लिङ्या,  
“जो सध्यो:सिउ पैङ्याव,  
प्रभुनी वाज़ ओसध्यो:सिक।”

### किताव ओल्यो हिताव ज़ डासथैचिउ

२ डानैं डामें, डा डादा जेल्योड  
डाहुव बेलाक परमेस्वरए  
मोंसिउलाव ओपाँ डासथैचिङ्याक  
बनै सैन्या मिंराए यापाँ मोहोन्यालो  
जैद यापाँङ्याव मितावनी डामापाँए।  
२ बुरू जेल्योड माहुद ज़ येसु ख्रीसए  
उमिन सोनो क्रुसत उजिउ भा:द  
ओयासिउए जूनी वाज़ डारापैया है  
डालिङ्याव। ३ भन जेल्योड डाहुक  
ते डासक्तीर माल्यो ताद छे·व ज़  
डालिके। ४-५ है जैद जेयुँ मिंराए  
याबुद्धीनी हुव पाँत ताहुक्क, परमेस्वरए  
ओसक्तीलाव थंरिउ पाँत वाज़  
ओताक लिद डा जेलाई परमेस्वरए  
ओपाँर डासथैचिक मिंराए याबुद्धीनी  
यारामोहोनैङ्याव मितावनी डासथैचिउ  
मा:क। बुरू नो डापाँत परमेस्वरए  
उपुरूस सोनो ओसक्ती ओरें:वनी  
वाज़ डासथैचिउ।

### परमेस्वरए उपुरूसनिकाव चाव बुद्धी

६ हितावत ब परमेस्वरए ओपाँत  
पाखो तावरालाई अचम्बलाव बिचार-  
नी हुव पाँर ब डारासथैङ्या। खाली  
नो पाँर आव जुकलाव बुद्धीनी  
ब मा:क, खेम्द बान्या घेप्पाराए  
यागहकनी ब मा:क। ७ गे गेरासथै-  
ङ्याव परमेस्वरए ओपाँ ते बनै उबुद्धी  
ल्यो आ:पै सुए ज़ यामाथ:रैताव  
कप्सिउ मिताव ज़ उलिङ्याव। खाली  
ओल परमेस्वरए ज़ नो पाँनी गेलाई  
ओज़गै मगैल लाँन्याए जूनी नाम नम  
ओमाजैदकिन ज़ आव बेलाए जूनी ज़  
गोइँद ओनैङ्याव। ८ आव जुकलाव  
घेप्पाराए परमेस्वरए ओगोइँनी  
ओदोव येन भन माथ:रैधुकेर। थ:रैद  
यासैव ताकिन ज़गै मगैव गेप्रभुलाई  
क्रुसत मासै:खेरहो।

९ है जैद गे गेरासथैङ्याव पाँए उजूनी  
धर्मसास्त्रल इताव सर्सिउ लिङ्या,  
“परमेस्वरए ओललाई  
मया दाङ्यावरालाई  
सुए ज़ यामारें:ताव,  
सुए ज़ यामाथैताव,  
सुए ज़ यामासैताव पाँर  
सतेंद याएरिङ्याव।”

१० नो पाँर फरी परमेस्वरए ओल उपुरूसए ज़ सतैदचासिकयो। होए वाज़ पाँ भरी सैज़्याव, परमेस्वरए उयुँलाव पाँर ब सैज़्याव। ११ गे मिँर ब गेक्याँताव पुरूसए वाज़ गेयुँलाव पाँ भरी सैज़्याव। हिताव ज़ परमेस्वरए उयुँलाव ओपाँर ब ओल उपुरूसए वाज़ सैज़्याव, छुतराए मासैंधुर। १२ गेलाई ओल परमेस्वरए ओयासिउ बरदानर सैव परीन्याए जूनी उपुरूस याद नैसिउ। नो पुरूस आव मानुवाताव बुद्धी स्यासोनी माःक, परमेस्वरनी हुव ज़ लिज़्या। १३ है जैद गेरासथैज़्याव भरी मिँए बुद्धीनी हुव माःक, परमेस्वरए उपुरूसए ओपैसि- ज़्याव वाज़ गेपाँज़्या। परमेस्वरए ओपाँ ते परमेस्वरए उपुरूसनी वाज़ पलास्सिज़्या। १४ परमेस्वरए उपुरूस माल्यो मिँए परमेस्वरए उपुरूसनिकाव हुव पाँ माभैःए। नोलाई ओअर्थ माल्यो पाँ मिताव ज़ लिज़्या। नो पाँर परमेस्वरए उपुरूसनी वाज़ सैन्या ओतावए माबुभिधुव। १५ परमेस्वरए उपुरूस दैव मिँए ते पाँ भरी थःरैधुज़्याव। छुतराए ते नोए ओपाँलाई माथःरैधुर। १६ धर्मसास्त्रल ब इताव सर्सिउ लिज़्या,

“परमेस्वरए उयुँलाव पाँलाई थःरैद,  
ओललाई पैधुज़्याव  
सु ची उलिज़्याव?”  
खाली गे ते ख्रीसए उयुँलाव पाँ दैवर गेलिज़्या।

### माखैवरालाई सुधारैन्या

३ अ डानै डामेर, डा जेस डालि- ज़्याक परमेस्वरए उपुरूस दैवरास डापाँज़्याव मिताव माताके। जे ख्रीसए ओबगाललाव माछिबो भाउज़ा स्यासोर वाज़ जेलिज़्यावए मानुवाताव मिँरास पाँज़्याव मिताव पाँव परिके। २ हो बेलाक ड़ादा ख्रीसए ओपाँ ड़ायाचिक ज़्याव माज़्युताव भाउज़ारालाई नुइँ याराएज़्याव मितावनी ज़ ड़ायाचिके, आःपै ब हाःवाकावर ज़ जेलिज़्या। ३ जे जेल सोसिन्या इसिन्या वाज़ ओतावए परमेस्वरए उपुरूस मादैव अइज़काव मिँ स्यासोर ज़ जेलिज़्या। ४ जे ख्वाराए ‘डा पावलसकाव’, ख्वाराए ‘डा अपोल्लोससकाव’ है जेलिकिन निताव जेपाँए परमेस्वरए ओपाँ मादैव स्यासोर ज़ जेलिज़्या। ५ अपोल्लोस सुदा? पावल सु? गिन परमेस्वरए सु सु गिनयेनत खतैद जेलाई परमेस्वरए

ओयेमदा लाँज्याव ओनोकोरनी वाज्ज माःक रो? ६डा परमेस्वरए ओपाँत धुर वास्ज्याव मिताव डालिज्या, अपोल्लोस री योःज्याव मिताव लिज्या। सपरीदयाज्याव ते ओल परमेस्वर ज़। ७है जैद धुर वास्ज्याव ब काता ज़ माःक, री योःज्याव ब काता ज़ माःक, सपरीद ओसै भाःदया-ज्याव परमेस्वर वाज्ज लिज्या। ८धुर वास्ज्याव सोनो री योःज्यावनी निलेखा तोबो ज़। सु सु नियेनए ओजेला दैरिज्यानी। ९गिन परमेस्वरए ओएँःल येन दाज्याव स्यासोनी गिन्लिज्या। जे परमेस्वरए ओएँः स्यासोर जेलिज्या, परमेस्वरए ओजैज्याव फ़िम स्यासोर ब जेलिज्या।

१०डालाई परमेस्वरए ओखतैनाव येनत ओल ओयाँव असिकनी ज़ पाखो भुली मिताव डा उफ़िमलाव गज डाथालिके। होए ओतर्त छुतए चाःज्याव, खाली होए जोगोइद ओचाःवक। ११गज ते ताधुके — नो गज येसु ख्रीस ज़। परमेस्वरए ओराज्याल छुत गज माले। १२नो गज तर्ताव याजैव सुन चाँदी तादी ब, ओएः ल्यो लुँर तादी ब, सीर छीर तादी ब, १३परमेस्वरए फाल्न्या छचाम मिँराए यादोव येन भरी मेंःनी जाँचिन्या ले।

नो यायेन चाव सैं माचाव लिन्या मेंःए ज़ सरैःदयान्या ले। १४नो गज तर्ताव उरिमो येन उथःरिकिन नो मिँए इनाम दैन्या ले। १५नो ओदोव येन फरी मेंःए ज़्याद ओएकिन, ओयेन भरी अनाकलाव तान्या ले, खाली ओल ते मेंःनी पुलुस्द ओबाँचिउ मिताव ज़ तान्या ले।

१६परमेस्वरए छैँव उपुरूस जेस बास दाद नैव लिन्या जेमासैँज्याव रो? जे ते परमेस्वरए चोखो उफ़िम ताद जेले। १७नो फ़िम छैँव ओल परमेस्वर लिन्या पो ओतावए जोए नो फ़िमलाई बलेःज्याव परमेस्वरए नोलाई ब बलेःन्या ले। नो फ़िम जे ज़।

१८है जैद जे सु ज़ ताभुकिच्यो। जोए आव मानुवाताव याथःरैव गोइँनी “डा प्राइँरानी सैँन्या डालिज्या” है उलिकिन होए ओसधयोःसिन्या ओरासोक। हो ताकिन ची परमेस्वरनिकाव साचो बुद्धी दैव मिँ तान्या ले। १९आव मानुवाताव बुद्धी परमेस्वरए ओड़ाक ते काता ज़ माःक। नोए उज्जनी धर्मसास्त्रल इताव सर्सिउ लिज्या,

“परमेस्वरए याबुद्धी ल्योरालाई  
या यापाँनी ज़ याक्योःज्याव।”

२०फरी तोथोल,

“याबुद्धी ल्योराए याबिचार

अन्नाकलाव लिङ्या लिन्या  
परमेस्वरए सैङ्याव।”

२१ है जैद जे मिरालाई तारासघ्योःच्यो,  
काराव ल्यो ताकिन प्राईं जेजूनी ज़  
लिङ्या। २२ पावल तादी ब, अपोल्लोस  
तादी ब, पत्रुस तादी ब, ताव भरी तादी  
ब, सिन्या तादी ब, बाँचिन्या तादी  
ब, आज्यालकाव पाँर तादी ब, हुन्या  
पाँर तादी ब, प्राईं जेजूनी ज़ जैसिउ  
लिङ्या। २३ जे ते ख्रीसए उमीर ज़,  
ख्रीस फरी परमेस्वरए उमीं ज़।

ख्रीसए ओसाचीर स्नो नो यानी  
सघ्योःसिङ्यावर

✂ है जैद इतावनी जे गेलाई,  
“आवर ख्रीसए ओसेवा  
दाङ्यावर, परमेस्वरए मोंसिउ ओपाँ  
पलास्ङ्यावर याल्यो” लिन्या सरेसो  
ताके। २ सेवा दोङ्यावराए यायेन,  
यार्गे परमेस्वरए है ओल्यो भरित  
सतस दाद उयुँ होलाँ जैदयान्या  
लिङ्या। ३ है जैद जे तादी ब, छुतराए  
तादी ब, जो मितावनी है जेदाँदी  
ब, जो मितावनी जेगोईनादी ब डा  
ग्याल गिल ज़ डामाताए। डानी ब  
डा इताव डालिङ्या है डामालिधुइ।  
४ खाली डाचेतैक परमेस्वरए ओयेन  
डाबलेःखेहो सा लिन्या डामासैए।

हैदी ब डा है डालिङ्यावनी माःक,  
डालाई छयानिन्या ओल परमेस्वर  
ज़ लिङ्या। ५ है जैद जे ब थिक बेला  
ओमाहुद छुतर ताराछयानिच्यो। गेप्रभु  
फरी उहुक चुम चुमोलाव मोंसिउ भरी  
ओज़लाँए सरैःरिङ्याव, प्राईं युँलाव पाँ  
ब सतैरिङ्याव। हो छयाम मिरालाई  
“चाव जेदोव ओल्यो, माचाव जेदोव  
ओल्यो” लिन्या ओल ज़ है दान्या ले।

६ डानैँ डामेंर, डा आक पै  
डासरोल जे अपोल्लोसस गिनलाई  
जेगोईँसिङ्यावनी गिन गिनमिन वाज़  
हाइद डानै। ननी ज़ जे गिनलाई रँःद  
डा है डालिङ्याव धर्मसास्त्रलाव पाँर  
याका जेदोकिन जे जेल सुए उमिनत  
ज़ स०द सघ्योःसिन्या जेमाले। ७ जे  
छुतए उमिननी नैँ मेंराकिन कै जैद  
चाव जेलिङ्याव? जेसकाव लिङ्याव  
भरी परमेस्वरए ल्योनी अइज़ जेदैव  
माःक रो? है जैद जे काराव मादैवराए  
मिताव जैसिद जेस०ङ्याव? ८ जे,  
“गेस प्राईं ज़ उलिङ्यावए धनी ताद  
परमेस्वरए ओराज्यालाव राजा ताद  
गेले,” है जेलिङ्या दी। इताव जेपाँए  
ते गिनलाई अपोल्लोसस ब बलेंद  
जेबाधुव ची ओल्यो! जे साचो निताव  
ज़ जेताव ताकिन ते तान्या ओल्यो।  
गिन ब जेस राजा तान्या गिनल्यो!

६खाली चिऊक ते गे परमेस्वरए ओसाची खतैसिउर प्राइरानी छींताव सिन्या सजा दैव स्यासोर गरैःज्या। नो गेलिज्याव सजाल आव मानुवाताव मिँराए याडाक सोनो परमेस्वरए ओचाकज्याराए याडाक चिऊसी निन्या मितावर ताद गेले। १०गे ख्रीसए उजूनी बरेःसी निन्यार ताद गेले, जे ते ख्रीसए उमिनत बधा घ्योःवर ताद जेले। गे कान्ल ज़ मागनिसिउ मितावर ताद गेले, जे ते घेप्पा मिन खिम्यार वाज़ ताद जेले। गे मिँराए डाक प़ैक्यार ताद गेले, जे ते मान दैव स्यासोर जेजैसिज्या। ११आख मनी ज्यान्या ओन्याए माथैद, करे करे थाकना बुरुम ज़ गेबारिज्या, लिन्या गेभिम ब माले, मुत्का लप्ता ब कैव ज़ गेनेज्या। १२परमेस्वरए ओपाँ गेरासथैक ब गेकुइए येन दाद गेडासिके। गेलाई थल्ज्यावरालाई असिक गेराएज्या, गेखिरी यापसिक ब गेसहिज्या, १३गेमिन बलेःदद्याज्यावरालाई ब चावनी ज़ गेरापजैज्या। गे आःपै मानुवातावराए याडाक कान्ल ज़ मागनिसिउ, युँ माजामो फ़िमसी स्यासोर ताद गेले।

### पावल याबाबु मिताव ज़

१४आव डासरो भरी जेलाई लाज मोर्नो जैन्याए जूनी माःक,

याबाबुए उयुँलाव ओज़ारालाई ओरामःलैज्याव मितावनी तखेप डासिडार्चिके। १५काराव ल्यो ताकिन जेलाई ख्रीसए ओपाँ पैज्यावर बनै कुधु ज़ यालिदी ब जेबाबु ते तोबो ज़ लिज्या। जेलाई येसु ख्रीसए ओपाँ डासथैचिउए डा ज़ जेबाबु मिताव डाताके। १६है जैद जेलाई है डादाचिज्या, डा डादोज्याव मिताव जे मनी दोच्यो। १७आवए उजूनी ज़ तिमोथीःलाई जेल्योदा परींद डानै। नो मिँ परमेस्वरए ओपाँत डायुँ हुबो डायुँलाव डाजा मिताव ज़ लिज्या। नोए डा पो पोडाव मन्दलीरालाई डारापैज्याव मिताव येसु ख्रीसए उमिनताव चलन दान्या जेलाई ब पैचिरिज्याव।

१८रूवा रूवार ते डा जेल्योड खर्क ज़ माहुन्या मिताव डम्मिद बनै स०ज्यार दी। १९हैदी ब गेप्रभुए उयुँ ओताकिन डा हतप्त ज़ जेल्योदा डाहुरिज्या। हो ताकिन नो स०ज्यावर यायाः वाज़ सैं साचो यासक्ती ब उलिज्याव रँःन्या डाले। २०परमेस्वरए ओराज्यालाव मिँर तान्या याःए वाज़ माःक, परमेस्वरए ओसक्तीनी दान्या मनी ज़। २१है जैद डा जेल्योदा डाहुक भुइस हुन्या सैं मया रैद चावस हुन्या जे ज़ सैंच्यो।



## याखालाव युँ माजामो येन

**५** जे जेखाल तोबो बनै युँ माजामो माचाव येन ताद ले दी लिन्या प्राइँदा ज़ थास्द ले। निताव येन परमेस्वरए ओपाँ मादैवराए खाल ब माले। जेनी तोबोए ओबाबुए कान्छी ओज्यालाई लाँद होस लिज्यानी दी लिन्या डाथैज्या। **२**जेखाल निताव येन लिज्यावत ब जे कै जैद स०द जेसघ्योःसिज्याव? बुरू जेयुँ माचाव दाद नो मिँलाई जेखानी पलेःन्या ओल्यो। **३**डाक्याँ जेल्योड ओमालिदी ब डायुँ ते जेस ज़ लिज्या। है जैद डा जेल्योड डालिज्याव मिताव नो मिँए ओयेन डाफाल्धुके। **४**जे गेप्रभु येसुए उमिनत जेदुप्सिक, डा ब गेप्रभु येसुए ओसक्तीस जेखाल ज़ डालिज्याव सम्जिद, **५**जे नो मिँलाई सैतानए उकुइत सँपिचिके। हो ताकिन युँ माजामो ओयेनरानी निताव दुखर सहिद गेप्रभुए फाल्न्या छचाम कसा उपुरूस माबाँचिए।

**६**जे काताए जूनी सघ्योःसिन्या? मुछिसिउ कनेल तकेज़ा सोगोडन्या वासः भाःकिन कने भरी सरालिज्याव लिन्या जेमासैए रो? **७**जे पुराँदो सरालिज्याव वासःलाई हाइद ख्याव

ताके। ख्रीसए निस्तार पबर्ब छचामकाव पाथा जैसिद उजिउ भाःद ओयासिउए जेखत माल्यो साःरोर जेताज्या। **८**है जैद जे नो पबर्ब चावस मानिन्याए जूनी जेखालाव पुराँदो सरालिज्याव वासः मिताव जेरुँलाव पापर, बलेःन्या येनर ख्याद साःरो छैव युँनी सतस दोव ताके।

**९**डादाडाव डापरीव चिथील, जे पातःन्या पातर्नी जैसिज्यावरास खदेप तालिच्यो लिद डासरो। **१०**नो है डाल्यो आव मानुवाताव लुभीर, धुतैद ज्याज्यावर, अडग्या पुजा दाज्यावरलाई माःक। नोराए ल्योनी पुलुःन्या ताकिन आव मानुवाताव प्राइँ मिँरानी ब अछतड ल्यो परिखेहो। **११**खास है डादाचिउ ते आव ची, जेसकाव यायुँ हुबो जैसिज्यावर पातःन्या पातर्नी जैसिज्यावर, मँःए मँःए बारिज्यावर, अडग्या पुजा दोज्यावर, थलज्यावर, लुभीर, धुतैद ज्याज्यावर यालिकिन, नितावरास सिप ब तालिच्यो, सिप ब ताज्युच्यो। **१२**गेकिन पाखाडावराए यायेन फाल्न्या गे माःक। गे गेराजाँचिज्यावर ते गेसकावरलाई वाज़। **१३**है जैद, “नो माचाव येन दोवलाई जेखानी हाइचिके।”

पाखाडावराए यायेन फाल्न्या ते ओल परमेस्वर ज़ लिज़्या।

### मुद्दा माभाःन्या

६ जे जेल नैं मेंस माखैव पाँर ओताक कै जैद परमेस्वरए उमिनताव मिँरालाई फालो मापरींद एकसब्दचा अदालतड जेबाज़्याव? २काता जे परमेस्वरए उमिनतावराए तछा मानुवाताव मिँरालाई याराफाल्रिज़्यार लिन्या जेमासैए रो? मानुवाताव पाँर तछा जेनी ओफाल्सिकिन कै जैद इताव जेखालाव तकेज़ा पाँर जेमाफ्याःधुज़्याव? ३हो बेलाक फरी परमेस्वरए ओचाकज्याराए यायेन ब गेफाल्रिज़्या। भन आव गेजिउताव पाँर कै जैद माफाल्न्या? ४इताव फाल्न्या पाँर जेखाल उहुक काराव मन्दलीए कान्ल ज़ ओमारागनिउरालाई फालो परीन्या? ५इताव पाँत जेलाज माहुज़्या? जे जेल जेपाँ फाल्धुन्याकावर तोबो ब जेमालिज़्याव रो? ६भन जे नैं मेंरालाई परमेस्वरलाई यायुँ माहुबोराए ल्योक लाँद मुद्दा ब जेभाःनाज़्या। ७खास दाद जे जेल मुद्दा जेभाःसिकिन हो ब लाज मोर्नो ज़ लिज़्या। बुरू निताव माखैन्या पाँर गाल्द कोरलैर जेसहिकिन तान्या ओल्यो। ८जे ते भन जेनैं मेंराए क्याँत ज़ लाँप चोप दाद अन्याय जेदोज़्या।

६अधर्मीर परमेस्वरए ओराज्याल माबाधुर लिन्या जेमासैए रो? है जैद जे ताभुकिच्यो, नो अधर्मीर इतावर ज़ — पातज्या पातर्नीर, अडग्या पुजा दोज़्यावर, अर्काए ओज्या रैज़्यावर, खेपा-खेपास मेंमा-मेंमास पातज्या पातर्नी जैसिज़्यावर, १०कुज़्यावर, लुभीर, मँःए मँःए बारिज़्यावर, थल्ज़्यावर, धुतैद ज़्याज़्यावर, आव भरी परमेस्वरए ओराज्याल बाधुन्या मालेर। ११जे ब रूवा रूवार हिताव ज़ जेल्यो। आज्याल ते नो भरिनी परमेस्वरए छेद छैँवर जैद नैचिउ। भन गेप्रभु येसु ख्रीसए उमिननी सोनो परमेस्वरए उपरूसनी जेखत माल्योर थ०रिद जेले।

### गेक्याँ कोभा येनए उजूनी माःक

१२जे रूवाराए है जेलिज़्याखेहो, “गेलाई कानुननी वैसिउ येन काता ज़ माले।” हैदी ब डा फरी जेलाई है डादाचिज़्या, प्राइँ येन क्याँए जूनी माले। डाकुइत प्राइँ येन उलिदी ब डा कोभा येनए ओबाँदा डामाताए। १३जे ते भन है जेलिज़्या, “ज़्याव भरी फूए उजूनी जैसिउ लिज़्या, फू ब ज़्यावए उजूनी जैसिउ लिज़्या।” खाली डा ते है डालिज़्या, परमेस्वरए नेथोलाई ज़ खेम्या ले। गेक्याँ युँ माजामो येनए जूनी माःक, प्रभुए

जूनी ची। फरी गेलाई चाहिज्याव भरी प्रभुए ओल ज़ जोरैद यासिज्याव। १४ परमेस्वरए गेप्रभुलाई किताव सिउनी ओसोचोइव, गेलाई ब नो ओसक्तीनी ज़ तछा अजम्बरी जुनील सोचोइसिरिज्याव। १५ जे जेक्याँ ख्रीसए उखँ कुइर ताद लेर लिन्या आःपै जेमासैए रो? हिताव ताकिन ख्रीसए ओक्याँ काराव पातर्नी मेंमाए ल्योदा लाँन्या? निताव सुए ज़ तादोवक। १६ जो पातर्नी मेंमास बाज्या हो पातर्नीस तक्याँल ज़ गनिसिज्यानी सानी। धर्मसास्त्रल ब नितावए उजूनी अइ लिद सर्सिउ लिज्या — “ज्या-री तावनी तक्याँ ज़ ताज्यानी।” १७ खाली जो मिँ परमेस्वरए ल्योदा जोरैसिज्या, नो परमेस्वरस तपुरूस ताज्या।

१८ पातज्या पातर्नी जैसिन्यानी अछतड ल्यो ताके। उपुर्काव पाप भरी ते क्यॉकिन पाखाड ज़ ताज्या। पातज्या पातर्नी जैसिज्यावए ते ओल उउपर्त ज़ पाप दोज्याव। १९ आव गेक्याँ परमेस्वरए छैँव उपुरूसए उक्किम लिन्या जेमासैए रो? नो परमेस्वरए ल्योनी गेदैव छैँव पुरूसए गेक्याँत बास दाद नैव। है जैद आव गेक्याँ गे गेमीं माःक, २० गेलाई परमेस्वरए गेएः फोःदचाद

उलँःसिउर ची। है जैद गे आव गेक्याँए परमेस्वरए उमिन सरैःदचाव ताके।

### ज्या-रीलाव पाँर

७ अब ते डालाई परींद जेयाँव चिथीनी तोबो तोबोनी है डादाचिज्या। खेपाए ज्या मादान्या चाव ज़ लिज्या। २ खाली पातज्या पातर्नी जैसिद बलेस्न्या ओताज्याव देखा बुरू खेपाए ज्या ओदोवक, मेंमाए रे ओदोवक। ३ ज्या-री नितावत फरी खेपाए ओज्यालाई अछतड तानैवक, मेंमा ब ओरेकिन अछतड तालिक। ४ ओज्याए ओक्याँ ओल उजूनी वाज़ माःक, ओरेए उजूनी मनी ज़। ओरेए ओक्याँ ब ओल उजूनी वाज़ माःक, ओज्याए उजूनी मनी ज़। ५ मेंमाए ओरेलाई ओल्योदा हुन्या तावैवक, खेपाए ब ओज्यालाई ओल्योदा हुन्या तावैवक। खाली परमेस्वरलाई पोंखारिन्याए जूनी जाँवा पै बातड बातड लिन्या निसखैदी ब निताव एकतार माःक, फरी सिप उलिनिक। निमालिकिन तोबोए उयुँ ओमानैधुकिन सैतानए बले-व पैवा। ६ आव है डादाचिउ पाँ मादाद माताए है डालिज्याव ते माःक, खाली इतावनी ताए सैँ है डालिज्या।

७ डा है डालिज़्याव मिताव ताकिन ते प्राइँ डा मिताव ज्या मादोवर याताकिन चाव ताखेहो। खाली परमेस्वरए प्राइँलाई छुत छुत किसिमलाव येन दान्या बरदान याद नैसिउ, ख्वारालाई किताव, ख्वारालाई किताव।

### बिह्या दान्या

८ ज्या मादावर सोनो रे मादावर, याज्या सिउर सोनो यारे सिउराए जूनी है डालिज़्या, डा स्यासो बातड लिधुकिन ते चाव ज़। ९ खाली उयुँ ओमानैधुकिन बिह्या ओदोवक। युँ भम माते धुज़्याव देखा ज्या दान्या, रे दान्या ज़ पाथ लिज़्या। १० फरी ज्या दावर सोनो रे दावराए जूनी आव है डालिज़्याव पाँ डानी वाज़ माःक, गेप्रभुए है ओल्यो पाँ मनी ज़, रे दाव मेंमाए ओरेलाई ख्यानैद ताबाक। ११ ख्यानैद ओबाकिन छुत रे मादाद ज़ उलिक, अथबा ओरेस ओखैहुक। हो मिताव ज़ ज्या दाव खेपाए मनी ओज्यालाई तारासोक।

उयुँ हुबो सोनो उयुँ माहुबो ज्या-रीनी

१२ फरी जे छुतरालाई है डादाचिज़्या। खास गेप्रभुए है ओल्यो पाँ ते माःक, डानी ज़ है डालिज़्या। जो उयुँ हुबो गेभाइए ओज्या उयुँ माहुबो उलिकिन फरी नो मेंमा ओरेस लिन्या खुसी

ओताकिन नो खेपाए ओज्यालाई तारासोक। १३ हो मिताव ज़ उयुँ हुबो मेंमाए ओरे उयुँ माहुबो उलिकिन, फरी नो खेपा ओज्यास खुसी ओताकिन नो मेंमाए ओरेलाई तारख्यानैवक। १४ नो उयुँ माहुबो खेपा ओज्याए ल्योनी ज़ छैँव ताज़्या। हिताव ज़ उयुँ माहुबो मेंमा ब ओरेए ल्योनी ज़ छैँव ताज़्या। हिताव ओमाताव ताकिन निज़ार ब माछैँवर ताखेरहो, खाली नोर ते छैँवर लिज़्यार। १५ फरी नो उयुँ माहुबो, खेपा तादी ब मेंमा तादी ब ओभाःसिकिन्दा घभाःसिज़्याक। नो उयुँ हुबो ख्यानैसिउलाई ब फुर्सुल ताज़्या, काराव ल्यो ताकिन गेलाई खुसीस खैद लिन्याए जूनी उखुल्सिउ ची। १६ तछा नरेलाई परमेस्वरए ओपाँत नरैधुज़्याक्या, नँ काता नसैए? हिताव ज़ नँ खेपाए ब नज्यालाई तछा परमेस्वरए ओपाँत नरैधुज़्याक्या नँ नमासैए।

### कितावल जेल्यो होल ज़ लिद ओसेवा दान्या

१७ खाली परमेस्वरए जो मितावल खुल्द खतैद नैचिउ, हो मितावल ज़ बाच्यो। पो पोडाव मन्दलीरालाई हैज़ डारादोज़्या। १८ क्याल्ल्या सरेस ताधुव मिँ परमेस्वरए ओपाँत उहुकिन नो मिँ क्याल्ल्या सरेस माजैसिउ मिताव

ताजैसिक। हो मिताव ज़ क्याल्न्या सरेस माजैसिउ मिं उहुकिन नो मिंए क्याल्न्या सरेस ताजैवक। १९नो सरेस जैसिन्या माजैसिन्या ओलेखा माले, परमेस्वरए ओपाँ दान्या वाज़ लिज़्या। २०परमेस्वरए ओराखुलो बेलाक किताव याल्यो हिताव ज़ उलिरक। २१परमेस्वरए ओपाँत उहुव बेलाक छुतए ओबाँदा ओल्यो ताकिन नोए उज़्नी सोगो तादोवक, नल ज़ उलिक। खाली नो मिं ननी हाइसिउ ओदैकिन नो मौका तारासोक। २२काराव ल्यो ताकिन परमेस्वरए ओपाँत जेहुव बेलाक छुतए ओबाँदा जेल्यो ताकिन परमेस्वरए ल्योनी रास्सिउर जेताज़्या। हो मिताव ज़ परमेस्वरए ओपाँत जेहुव बेलाक सुए उधूँल ज़ जेमाल्यो ताकिन अबकिन ख्रीसए उधूँल जेताके। २३है जैद जेलाई ख्रीसए उजिउ भ्नाःद ओलँःचिउर जेतावए छुतए ओबाँदा ताजैसिच्यो। २४डानै डामेर, जे परमेस्वरए ओपाँत जेहुव बेलाक कितावल जेल्यो, होल ज़ लिद परमेस्वरए ओसेवा दोचिके।

### बिह्या मादोतावर

२५ज्या मादोताव, रे मादोतावराए जूनी है डादाचिज़्या। आव पाँ गेप्रभुए ल्योनी ते माःक। हैदी ब डा डाल्योनी ज़ डासम्जैचिज़्या। खाली परमेस्वरए

डाल्योदा उयुँ ओनावनी आव डापाँ युँ हुबो पाँ ज़ लिज़्या। २६आज्यालकाव इताव धो सहिउ दुखर गेक्याँत याहुरि-ज्यावए बुरू जे किताव जेलिज़्याव हिताव ज़ जेलिकिन पाथ लिज़्या। २७खाली बिह्या जेदोधुव ताकिन जेज्यारास ताभाःसिच्यो। जेमादोताव ताकिन बिह्या दाव तापैच्यो। २८हैदी ब जे खेपाराए ज्या जेदोदी ब पाप ते माले। हिताव ज़ बिह्या मादोताव मेंमाराए रे यादोदी ब पाप माले। खाली बिह्या दोज़्यावराए आव जिउत दुखर दैर सैं लिद डा जेलाई ननी जोगोइव डापैज़्या।

### याज्या माल्योराए यातापज़्याव मिताव ताप्य्या

२९आव तोबो पाँ ब है डादाचिज़्या डानैँ डामेर, खेमन्या बेला नजिक उहुवए आकिनी याज्या ल्योर याज्या माल्यो स्यासोर ओजैसिरक। ३०सोगो दोज़्यावर मादोज़्याव स्यासोर ओजैसिरक, रेंज़्यावर मारेंज़्याव स्यासोर ओजैसिरक, लँःज़्यावर यास काता ज़ माल्यो स्यासोर ओजैसिरक। ३१आव मानुवातावर याराचलैदी ब लन्था मादोज़्याव स्यासोर ओजैसिरक, काराव ल्यो ताकिन आव मानुवाताव जेरँःज़्याव भरी अइज़ खेमन्या मान्यादा वाज़ बाज़्या।

३२ जेलाई आव भरिए जेयुं आँचा पाँचा घमाजैरक लिद है डादाचिज्या। ज्या मादाव खेपाए ‘परमेस्वरए उयुं कातानी होलाँ जैद डाएके’ लिद नदा वाज उयुं थू जैज्याव। ३३ ज्या दावए ते ‘डाज्यालाई कातानी खुसी डाजैके’ लिद मानुवाताव लन्थाल ब लिज्या। ३४ नितावए उयुं नेथोदा ज़ ताज्या। हिताव ज़, रे मादाव मेंमाए ‘आव डाक्याँ डायुंलाई कातानी छैंव डानैके’ लिद परमेस्वरए ल्योदा वाज उयुं थू जैज्याव। रे दाव मेंमाए ते ‘डारेलाई कातानी खुसी डाजैके’ लिद मानुवाताव लन्थाल ब लिज्या। ३५ आव भरी जेजूनी ज़ है डादाचिज्या। आव पाँरानी जेलाई सुर्द डानैचिज्याव ते माःक, जेलाई तयुं जैदचाद प्रभुए ओसेवा दान्यात पाथ पारैन्याए जूनी ची।

### मेंमा याज़ा ल्योर

३६ फरी जेज़ा ल्योरालाई है डादाचिज्या, मेंमा जेज़ारालाई रे दाव मायाद करस नैन्या माःक। बैस हुद रे दान्याकाव ओतावत, नो मेंमा रे मादाद मातान्या मिताव उलिकिन नोलाई तावैच्यो, दाव एच्यो।<sup>†</sup> आल

पाप माले। ३७ नो मिँए फरी ‘डाज़ालाई रे दाव मायाद खुसीस डानैधुया’ है लिद उयुंल ओथःरैकिन सोनो कर लैन्या पाँर यामाहुकिन, उयुंलाव ओथःरैव मितावनी ओज़ालाई ओनैःधुकिन चाव ज़ लिज्या। ३८ ओज़ालाई रे जैदचाज्यावए चाव ज़ दोज्याव, ओज़ालाई रे जैद मायाज्यावए भन चाव जैक्यो।

### राँदी मेंमार

३९ फरी मेंमा ओरे ओलेवा भरी ओरेए ओसतत ज़ ल्यो परिज्या। ओरे उसिकिन वाज़ छुतस रे दान्या उखुसी ताज्या। खाली नो छीनीकाव ओरे परमेस्वरए ल्योदा उयुं हुबो मिँ ताव परिके। ४० खाली डा डाबिचारल ते नो राँदी मेंमा रे मादाद निताव ज़ उलिकिन भन खुसी तान्या ले। आव पाँत परमेस्वरए उयुं ब लिज्याखेहो ज़ है डालिज्या।

### अडग्यालाई चरैःसिउ ज़्याव

४१ फरी अडग्यालाई चरैःसिउ ज़्यावए उजूनी है डादाचिज्या। तान्या ते आव पाँए उजूनी गे प्राइँए ज़

<sup>†</sup>७:३६ १ कोर ७:३६-३८ ग्रीक खामनी नेथोनी बुभिसिज्या। छुत बुभिन्या आव ज़ — छोज्याए बिह्या मादाद मातान्या ते माःक, खाली छोज्याए लुज़ालाई निद बिह्या दाव ओपैकिन ओदोवक।

गेसैंज्या, खाली सैन्या जैसिज्याव मिं ते स०ज्या। नें मेंलाई चिऊन्यानी वाज्ज प्राईलाई तान्या ताज्या। २जोए 'डा ज्ज बनै डासैंज्या' है लिज्या, नो मिंए आःपै सैव परिन्या भरी काता ज्ज मासैंताव। ३जोए परमेस्वरलाई मया दोज्याव, होलाई परमेस्वरए सरेस्ज्याव।

४है जैद फरी ब तखेप नो अडग्या-लाई चरैःसिउ ज्यावए उजूनी है डादाचिज्या। गे गेसैंज्या, नो अडग्या काता ज्ज माःक। तोबोका तोबो परमेस्वरकिन छुत काता ज्ज माले।

५नाम नमल दै देवता यारादोज्यावर, प्रभु यारादोज्यावर बनै कुधु ज्ज यालिदी ब, ६गे गेपरमेस्वर ते तोबो वाज्ज लिज्या, नो गेबाबु परमेस्वर ज्ज। ताव भरी ब ओल ओराजैव ज्ज, गे ब ओल उजूनी जैसिउर ज्ज। गेप्रभु ब तोबो वाज्ज लिज्या, नो येसु ख्रीस ज्ज। परमेस्वरए ओराजैव भरी नो गेप्रभुनी ज्ज याजैक्यो। गे गेदैव अजम्बरी जुनी ब ओल गेप्रभुनी ज्ज। ७खाली मिं भरिए अडग्या काता ज्ज माःक लिन्या चबनै माथःरैतार। है जैद रूवा रूवाराए डादाडाव याचलननी अडग्यालाई साचो देवता याजैवए आःपै मामेंःधुर। है जैद अडग्यालाई चरैःसिउ ज्याव याज्युकिन 'आव पाँ माचाव ज्ज' थःरैद याखत ल्योर याताव डम्सिज्यार। ८नो ज्याव गेज्युदी ब गेमाज्युदी ब

परमेस्वरस खैव जैव मादोव, माखैव ब जैव मादोव।

९हैदी ब डा है डादाचिज्या, आव पाँरानी जोगोइसिद लिच्यो, मानी जे 'जो गेज्युदी ब ताए' है जेलिज्यावनी 'आव चाव, आव माचाव' लिन्या माछुतैधुज्यावरालाई जेराबलेःया।

१०निताव मिंए जे परमेस्वरए ओपाँत सैन्या जैसिज्यावराए अडग्यालाई याचरैःव ज्यावर मन्दिरल जेज्युज्याव उरेंःचिकिन, भन माज्यान्या ओथःरैव-लाई फरी ब ज्याद ओरासो येनलाई फरी ब दान्या ओछ्यास लिज्या।

११जे परमेस्वरए ओपाँत 'गे ज्ज सैन्या गेलिज्या' है लिज्यावराए ज्ज चाव माचाव माछुतैधुज्यावरालाई भन ज्ज जेराबलेःज्या। नो जेराबलेःज्यावर मनी ख्रीसए उजिउ भाःद ओरायो जेभाइर ज्ज। १२निताव जेभाइरालाई बलेःद, मादान्या याथःरैव येनलाई फरी दाव जेरापरींवए ख्रीसए ओक्याँत ब पाप जेदोके। १३है जैद डाभाइलाई ज्यावए ओबलेःकिन नोलाई ओबलेःज्याव देखा बुरू डा स्याकरी खर्क ज्ज कैन्या डामाले।

पावल बाँदा मिताव ओजैसिउ

६ काता डा फुर्सुल ताव माःक रो? काता डा परमेस्वरए ओसाची खतैसिउ माःक रो? काता डा गेप्रभु

येसुलाई रँ:व मिँ मा:क रो? काता जेलाई गेप्रभुए ओपाँत सिर्जेज्याव डा मा:क रो? २ छुतराए ल्योनी परमेस्वरए ओखतैनाव ओसाची डामारै:दी ब जेनी ते डालिज्या ज़। परमेस्वरए ओपाँनी जेक्याँताव डादोव भरी ओसरेस ज़ रँ:ज्या।

३ डा डाउपत पाँज्यावराए जूनी डाजवाप आव ज़, ४ डा डायेनए जूनी ज्यान्या ओन्यार दैन्या ओमाताज्याव रो? ५ पत्रुस, गेप्रभुए ओभाइर सोनो उपुर्काव ओसाचीराए यायुँ हुबो याज्यार यास यास यारालाँज्याव मिताव डा ब डामादैए रो? ६ गिन बारनाबासस वाज़ पो पोड परमेस्वरए ओपाँर गिन्रासथैक गिन ज़ छुत येनर दाद ड़ासिन्या रो? ७ सिपाईए ब राजाए ओयेन ओदोक ओल ओज्याव ज्याद मादोव सानी। एँ:लाव येन दोज्याव मिँए ब नलाव ओसै दैज्याव सानी। बेधा गावलाए ब बेधाराए याहारनु ज्याव दैज्याव सानी।

८ आव डापाँज्याव भरी मिँए उबिचारनी वाज़ मा:क, परमेस्वरए ओकानुनल ब लिज्या। ९ धर्म-सास्त्रलाव मोसाए ओकानुनल ब इताव सर्सिउ लिज्या,

“दाइ भा:ज्याव घेँलाई

ओया:त महला भा:दयान्या माताए।”

आव पाँ परमेस्वरए घेँए उजूनी वाज़ ओपाँव रो? १० नो पाँ गे मिँराए गेजूनी ब सर्सिउ लिज्या सानी। छुतए ओएँ: कीज्याव मिँए ब ‘या:थन डादैया’ लिद कीज्याव। छुतए ओबाला प्रोदचाज्यावए ब या:थनए उजूनी ज़ प्रोज्याव। ११ है जैद गे ब जेखाल परमेस्वरए ओपाँ वास्ज्यावरालाई चाहिज्यावर जेल्योनी ज़ दैव परिन्या सानी। १२ गेकिन छीनी जेल्योड परमेस्वरए ओपाँ सथैना हुवराए निताव दैन्या हक उलिकिन गे गेहक ब ल्यो परिन्या ज़।

हैदी ब निताव हक खर्क ज़ गेमाचलैए। बुरू स्त्रीसए चाव ओथा कातानी ब तावैसिक लिद प्राईं गेसहिज्या। १३ जे ब जेसैज्याखेहो, ध्यान भिमल परमेस्वरए ओसेवा दोज्यावए मिँराए याचरै:व ज्यावनी ओडासिज्याव। पुजारीए ब मिँराए थानत याचरै:हुव मारनी उजू ओदैज्याव। १४ हिताव ज़ गेप्रभुए ब ओल ओपाँ सथैज्यावरालाई ननी ज़ डासिन्या जैद याएक्यो। १५ हैदी मनी डा ते आव हक भरी डामाचलैए। डा जेलाई, “काराव जेमायाँज्याव”



है डालिज़्याव ते माःक। डालाई परमेस्वरए ओयेनत सुवाराए तलब मिताव जैद कातार यायाँकिन डामुनी कातानी उरहिरिज़्याव? हो देखा बुरू डालाई सिन्या पाथ लिज़्या। १६ परमेस्वरए नो येनत डालाई ओखतैनावए ओपाँ सथैन्या डामुनी नैन्याए जूनी ते माःक, ओपाँ मासथैद माताए। परमेस्वरए ओपाँ डामारासथैकिन कातानी डायुँ होलाँ ओतारिज़्याव? १७ आव येन डानी ज़ डारूजिउ ताकिन ते जेला रैदी ब ज़्यास्खेहो। खाली ड़ ड़ाखुसीनी माताद परमेस्वरए ज़ आव येनत ओखतैनावए ड़ दाव ज़ परिज़्या। १८ है जैद ड़ ड़ाजेला ते ड़ा दैन्या ड़ाहक भरी रास्द सुए ल्योनी काता ज़ मारैद अइज़ परमेस्वरए ओपाँ सथैन्या लिज़्या।

१९ है जैद ड़ा प्राइँ मिँराए ल्योनी फुर्सुल ताव ड़ालिदी ब, कुधु मिँरालाई ख्रीसए ल्योदा जैन्याए जूनी प्राइँराए याबाँदा मिताव जैसिद ड़ाले। २० यहूदीरालाई ख्रीसए ल्योदा जैन्याए जूनी यहूदी ब ड़ाजैसिके। मोसाए ओकानुन धूँल लिज़्यावरालाई ख्रीसए ल्योदा जैन्याए जूनी नो कानुन धूँल ड़ामालिदी ब कानुन धूँलाव ड़ाजैसिके। २१ फरी मोसाए ओकानुन मासैतावरालाई ख्रीसए ल्योदा जैन्याए

जूनी ड़ा परमेस्वरए ओकानुन सोनो ख्रीसए उधूँल ड़ालिदी ब कानुन माल्यो मिताव ब ड़ाजैसिके। २२ चाव माचाव माछुतैधुज़्यावराए या किताव याबिचारिज़्याव ड़ा ब हितावनी ज़ ड़ारासमजैके। है जैद ड़ा जुनी ब परमेस्वरए ल्योदा तोबो नेब्लो जैन्याए जूनी प्राइँ मिँराए जूनी प्राइँ ज़ ड़ाजैसिके। २३ आव ड़ादोज़्याव भरी ख्रीसए चाव ओथाए उजूनी ज़ ड़ादोज़्या। ननी ज़ परमेस्वरए ओपाँताव असिकर ड़ा ड़ाजुँ ब दैन्या ड़ाले।

### बाजी दैन्यात कलँ लिन्या

२४ जे ज़ जेसैज़्याखेहो, धोंःन्यात दाँजिसिज़्यावर बाजी दैन्या ते तोबो वाज़ ताज़्या। है जैद जे ब बाजी दैन्या मितावनी ज़ दाव ताके। २५ फरी घेप्पा घेप्पा खेलल दाँजिसिज़्यावर ब भाःसिन्यात बनै कलँ लिज़्यार। नोराए खेम्न्या बाजी थाँसिउए जूनी दोज़्यार, गे ते खर्क ज़ माखेम्न्या स्वर्गताव इनाम दैन्याए जूनी गेदोज़्या। २६ है जैद ड़ा माताकिद धोंःज़्याव सोनो बतासत मुत्का भाःज़्याव मिताव ड़ार्सा सैःद ड़ामादोए। २७ बुरू ड़ा नो खेललाव भेंःस्याराए यादोज़्याव मिताव ड़ाक्यौँलाई काबु जैद काचाबुल दाव ड़ापरींज़्या। है ड़ामाजैकिन

डा छुतरालाई परमेस्वरए ओपाँत रैङ्याव मिँ भन नोराकिन डा ज़ काम मालागिउ तान्या डाले।

### इस्त्राएलीराए ल्योनी चेतावनी

**१०** अ डानैँ डामेर, जेलाई जोगोइन्याए जूँनी तोबो पाँ है डादाचिङ्या। भाःक गेसाखा पुर्खार इजिपनी यापुलुस्ङ्याक नो धोइ धोइव बादलस समुन्द्र खालाव घ्याँ बाकेर। २नोर बादल सोनो समुन्द्रनी यापुलुसोत मोसाए उमिनत यासछैँसिउ मिताव ताके। ३नोराए परमेस्वरए सवाद ओरायो तोबो ज़्याव ज़ प्राइँए ज़्युकेर। ४फरी परमेस्वरए सपरीद ओरायो बाँचिन्या री ब प्राइँए ज़ ओकेर। नो री पो पोक परमेस्वरए जोरैद ओरायो पहरनी ज़ ओकेर। नो पहर ओल ख्रीस ज़ ओल्यो। ५नाः चाव दैङ्यावत ब नोराए परमेस्वरए उयुँ कोला कोला जैदिकेर। है जैद परमेस्वरए नो बनल ज़ नोरालाई सोतोङ्यान याख्याक्यो।

६गे परमेस्वरए ओपाँत हुवरालाई आव पाँ भरी सतैँसिउ मिताव लिङ्या। है जैद गे मनी नोराए माँःती माचाव

येनदा युँ भाःन्या माःक। ७नोर ख्वाराए अडग्या पुजा यादोव मिताव ब दान्या माःक। धर्मसास्त्रल ब नोराए जूँनी इताव सर्सिउ लिङ्या,

“मिँर बनै थाँतस ज़्याद ओद,  
स्याद धापा धामें  
जैसिनाकेर।”

८गे ते नोरानी ख्वा ख्वाराए यादोव मिताव पातङ्या पातर्नी जैसिन्या माःक। ननी ज़ नोर तछात ज़ तेईस हजार सिकेर। ९नोरानी ख्वा ख्वाराए यादोव मिताव गेप्रभुलाई जाँचिन्या माःक। ननी ज़ कुधु मिँर घुलराए दा-द सिकेर। १०फरी नोरानी ख्वा ख्वाराए परमेस्वरलाई गन गन यादोव मिताव ब दान्या माःक। ननी ज़ नो सैःङ्याव परमेस्वरए ओचाकङ्या हुद यासैःक्यो। ११नोराए याक्याँत ताव भरी गे आव संसार खेन्त्या बेला दैहुवरालाई चेतावनीए जूँनी सतैँद नैसिउ मिताव सर्सिउ लिङ्या।

१२है जैद “डा ते परमेस्वरए ओपाँत बनै थ०रिउ मिँ ची” है लिङ्याव मिँ जोगोइसिद उलिक, मानी धलिन्या ओछ्यास लिङ्या। १३आःपै ते जेक्याँत मिँराए मासहिधुन्या जाँचर

माहुताए। बुरू जेसहिधुन्या जाँच-  
राकिन आगल्या जाँचर परमेस्वरए  
हुव मारायो। परमेस्वर युँ हुबो लिज्या।  
फरी कैताराक जाँचर उहुकिन  
पुलुस्न्या येम याद नो जाँचराल  
सहिधुन्या ब जैचिरिज्याव।

### अडग्या पुजा सोनो प्रभु-भोज

१४ है जैद डायुँलाव डानैँ डामेर,  
अडग्या पुजानी अछतड लिच्यो।  
१५ जे पाँ माबुफिधुन्यार जेमाले। है  
जैद आव है डादाचिज्याव पाँ साचो सैं  
मा:क जे ज़ जेयुँल खामिच्यो। १६ प्रभु-  
भोजल परमेस्वरलाई धन्याबाद चरै:द  
खुरीनी गेओक ख्रीसए उभीस तोबो  
भी ज़ गेताज्या। फरी नो भरेस के:द  
गेज्युक ब ख्रीसए ओक्याँस तोबो क्याँ  
ज़ गेताज्या। १७ नो तोबो भरेसलाई  
प्राइँए गेज्युवए गे माहोल्या गेलिदी ब  
प्राइँ तोबो क्याँ गेताज्या।

१८ इस्राएलीर ब हिताव ज़ यालि-  
ज्याव। थानताव तोबो ज्याव प्राइँए  
याज्युवए या भरी ब प्राइँ खैद तोबो  
ज़ ताकेर। १९ नो है डादाचिज्यावए  
ओअर्थ आव ज़, अडग्या सोनो  
थानत चरै:सिउ ज्याव काता ज़  
मा:क। २० नताव चरै:सिउ ज्याव भरी  
परमेस्वरलाई मा:क, भ्या मोंराए जूनी

ची। है जैद जे भ्या मोंरास ताखैच्यो  
लिद है डादाचिज्या। २१ जे प्रभु-भोज  
सोनो अडग्यालाई चरै:सिउ ज्याव  
नेथोनी कै जैद जेज्युधुरिज्याव? नेयेन  
सुए ज़ मादोधुव। २२ काता परमेस्वरए  
उयुँ कोला कोला जैदयान्या रो? सैं  
ओलकिन घेप्पार गेलिज्याव?

### क्याँए तिर वाज़ दान्या मा:क

२३ जे ख्वाराए है जेलिज्याखेहो,  
“गेलाई कानुननी वैसिउ येन काता  
ज़ माले।” हैदी ब डा फरी जेलाई है  
डादाचिज्या, प्राइँ येन क्याँए जूनी  
माले। डाकुइत प्राइँ येन उलिदी ब  
ख्वा येनए नैँ मेंलाई ब बले-ज्याव।  
२४ जो येनत तादी ब क्याँए तिर वाज़  
दान्या मा:क, नैँ मेंलाई ब चिऊव  
ताके।

२५ दोकानल थाँसिउ स्याकरी  
जेलँ:क, “आव स्याकरी कैन्या ताके  
सैं माताकेमा?” है लिन्या मासम्जिद  
ज़ लँ:च्यो। २६ काराव ल्यो ताकिन  
धर्मसास्त्रल इताव सर्सिउ लिज्या,

“नाम सोनो नलाव लिज्याव भरी  
परमेस्वरए उमीर ज़।”

२७ फरी परमेस्वरलाई उयुँ माहुबो मिँए  
ज्यास्न्याए जूनी उखुल्चिक, बान्या जेयुँ  
उलिकिन, जेड़ाक भा:द ओयाचिउ

ज्याव भरी जेयुँल “आव ज्यान्या ताके सैं माताकेमा?” है लिन्या मासम्जिद घाइ मालिद ज़ ज्युच्यो। २८खाली नो मिँए, “आव पुजाल चरै:सिउ ज्याव,” है ओदाचिकिन नो मिँलाई चाव माचाव छुतैव परीन्याए जूनी नो ज्यावलाई छु ज़ ताछुच्यो। २९नो ‘चाव माचाव छुतैन्या’ है डालिज्याव जे जेजूनी मा:क, नो है लिज्याव मिँए उजूनी ची। जे फरी है जेलिज्याखेहो, “गे प्राइंनी फुर्सुल तावर क्याँए माहाँत लिज्यावरालाई कै जैद छुतए उयुँलाव पाँए गेलाई कैन्या माकैन्या ओजैसिज्याव?” ३०जे ते भन, “नो ज्याव धन्याबाद चरै:द गेज्युकिन नो मिँए गेलाई कातानी गेमिन बले:द ओयासिरिज्याव?” है जेलिज्याखेहो। ३१डा फरी है डादाचिज्या, जे नै तालिच्यो। बुरू जेदोज्याव भरित, ज्यान्यात तादी ब, ओन्यात तादी ब, ‘कातानी परमेस्वरए उमिन सघ्यो:द डाएके’ लिन्यानी वाज़ दोच्यो। ३२यहूदीरालाई तादी ब, ग्रीकरालाई तादी ब, परमेस्वरए ओमन्दलीलाई तादी ब, सुलाई ज़ जे यायुँ के:दचान्या पाँ तादोच्यो। ३३बुरू डा मनी डालाई तान्यानी मादाद प्राइँए अजम्बरी जुनी ओदरैक लिद प्राइँलाई तान्याए जूनी सेवा डादोज्या। जे मनी नितावनी ज़ दोच्यो।

११ किताव डा ख्रीसए ओदो-ज्याव मिताव डादोज्या, हिताव ज़ जे ब डा डादोज्याव मिताव दोच्यो।

### परमेस्वरए ओसेवा तहस दान्या

२जे डालाई प्राइँनी प्राइँनी जेचेतैनाज्याव सोनो डापैचिउ पाँर मारास्द जेदोज्यावए धन्याकावर है डादाचिज्या। ३हैदी ब फरी तोबो पाँ डासम्जैचिज्या। खेपा भरिए गेडै ख्रीस लिज्या, मेंमा भरिए याडै खेपा लिज्या, ख्रीसए ओडै परमेस्वर लिज्या। ४है जैद खेपाए ओडै कपद परमेस्वरलाई ओपोंखारिकिन, परमेस्वरए ओपाँ ओरासथैकिन, नो मिँए ओडैलाई बीज्यात जैज्याव। ५हिताव ज़ फरी मेंमाए ओडै माकपद ओपोंखारिकिन, परमेस्वरए ओपाँ ओरासथैकिन, नोए ओरेए ओमान नैद ओमायोए ओचेम एन्द ओख्याव मिताव लिज्या। ६है जैद मेंमाए ओडै माकपद ज़ ओपोंखारिकिन, नोए ओचेम एन्द ओख्यादी ब ताए। खाली मेंमाए ओचेम ख्यान्या लाज हुव ओतावए बुरू ओडै कपद परमेस्वरलाई ओपोंखारिकिन। ७खेपा फरी परमेस्वरए उसुरूप सोनो उसिडार ओतावए परमेस्वरए ओपाँ ओरासथैक नोए ओडै ताकबोक।

मेंमा फरी खेपाए ओसोभा ज़। ८ खेपा मेंमानी सिर्जेसिउ माःक, मेंमा खेपानी सिर्जेसिउ ची। ९ सोनो परमेस्वरए खेपालाई मेंमाए उजूनी ओजैव माःक, मेंमालाई खेपाए उजूनी ओजैव ची। १० है जैद परमेस्वरए ओचाकज्याराए डाक मेंमाए, “डारेए ओपाँ धूँल डालिज़्या” लिन्या सतैन्याए जूनी ओडै ओकबोक। ११ हैदी ब प्रभुए ओडाक खेपा ओमातावा मेंमा माताए, मेंमा ओमाताव खेपा माताए। १२ काराव ल्यो ताकिन स्त्रिस्तील मेंमा खेपानी ताव ज़, हाःकिन खेपा भरी नो मेंमानी ज़ ताज़्यार। हैदी ब गे भरी प्राइँ परमेस्वरनी ज़ गेसिर्जिज़्या। १३ मेंमाए ओडै माकपद परमेस्वरलाई ओपोंखारिकिन नो किताव जेडम्सिज़्या? जे ज़ सैच्यो। १४ किताव खेपाए ओचेम बनै ख्योःव ओनैकिन लाज हुव लिज़्या लिन्या सुए ज़ है यामादाचिदी ब जेनी ज़ जेसैँज़्या, १५ हिताव ज़ मेंमाए ओचेम ख्योःव ओनैकिन नोलाई ओसोभा हुव लिज़्या लिन्या ब जेसैँज़्या। नो ओचेम ओडैलाई कपन्याए जूनी यासिउ लिज़्या। १६ खाली आव डापाँर थैद सुवाराए माभैँद खर्लेसिउ यापैँकिन गे सोनो परमेस्वरए ओमन्दलीरास आव चलन वाज़ लिज़्या है डारादोज्या।

### प्रभु-भोज

१७ आव तोबो पाँल ते डा जेलाई डामासमैँचिधुइ, काराव ल्यो ताकिन जे परमेस्वरए उमिनत जेदुप्सिक सु ज़ माबनिद भन ज़ जेबलेस्नाके। १८ प्राइँरानी जेलाई बलेःज्याव पाँ आव ज़ लिज़्या, जे मन्दलील जेदुप्सिक माखैद रूवा तँदा भेलेते रूवा तँदा भेलेते जेजैसिज़्या दी लिन्या डाथैँज़्या। नो साचो मनी ताखेहो है डालिज़्या। १९ जे जेखार्ल साचो मिँ सरेस्न्याए जूनी निताव खर्लेसिन्या ब ताज़्याखेहो! २० है जैद जे प्रभु-भोजल जेदुप्सिक प्रभुए उजूनी ते साचो मारैँके। २१ भन सु सु जेज्याव रैद ज्युना जेहुव मिताव जैद नैलाई ब माकींद डादा ज़ कार्लानी कुर्लु जेखेम्ज्या। है जैद रूवार ते करे ज़ जेताज़्या, रूवार ते ज़्याद ओद मँःद लोलोतोःव ब जेताज़्या। २२ काता, निताव ज़्यान्या ओन्या पो जेभिमक ओमालिज़्याव रो? सैँ परमेस्वरए ओमन्दलीलाई सोद माथैँव मायोःवरालाई लाज मोर्नो जैना जेहुज़्याव रो? जे मितावरालाई डा कै दान्या ओताव? कातानी ची जेलाई धन्याकावर है दान्या? इतावनी जेलाई धन्याकावर है डामादाचिधुइ।

२३ आव पाँए उजूनी गेप्रभुए ल्योनी किताव डादैव, हिताव ज़ जेलाई ब डायाचिके। गेप्रभु येसु ओक्योःसिज़्याव छचाम रील प्रभुए भरेस उकुइत रैद, २४ धन्याबाद चरैःद नो भरेसलाई केःद, “आव भरेस जेजूनी भाःद डायाचिरिज़्याव डाक्याँ ज़। आकिनी जेजूनी दाद डायाचिउ येन मामेंःन्याए जूनी इताव ज़ दोच्यो,” है यादोक्यो। २५ नकिन नो भरेस याज़्युवत गेप्रभुए फरी खुरी उकुइत रैद, “आव डाभी ज़। आनी ज़ परमेस्वरए जेस साःरो बाचा नैदयाचिरिज़्याव। है जैद आव खुरीनी जेओक जेजूनी दाद डायाचिउ येन तामेंःच्यो,” है यादोक्यो।

२६ जे नो भरेस जेज़्युक सोनो खुरीनी जेओक गेप्रभु फरी स्वर्गनी ओमाहुवा पै ज़ गेप्रभुए उजिउ भाःद ओयासिउ लिन्या जेसतैँज़्या। २७ है जैद जोए प्रभु-भोजल प्रभुए उगुन माचेतैद बिनु सोर उज़्युकिन ओओकिन, नो मिँए प्रभुए ओक्याँ उभीलाई बीज्यात ओजैवनी ओखत ल्यो थ०रिज़्या। २८ है जैद जे सु सु जेयुँलाई जाँचिद वाज़ नो भरेस ज़्युच्यो सोनो खुरीनी ओच्यो। २९ जोए प्रभुए ओक्याँताव याकार माथ०रैद नो भोज उज़्युकिन ओओकिन,

नो मिँए ओक्याँत सजा रैज़्याव। ३० ननी ज़ जेखाल कुधु याजोरो हुव रूगीर लिज़्यार, ख्वार ते सिधुकेर। ३१ बुरू गेक्याँलाई गे ज़ गेजाँचिकिन परमेस्वरए गेलाई ओजाँचिसिक निताव सजा यान्या माले। ३२ खाली परमेस्वरए ल्योनी सजार गेदैक गेलाई ओलकिन तँदा लिज़्यावरास नास तातारक लिद गेजूनी ज़ म०लैसिज़्याव।

३३ है जैद डानैँ डामेर, प्रभु-भोजल जेदुप्सिक प्राइँ जेमादुमा पै कीसिच्यो।

३४ फरी सत्राँसिन्याए जूनी जेहुज़्याव ताकिन सु सु जेभिमक जेकरे सैःद हुच्यो, मानी नो सजाल परिन्त्या जेले।

उपुर्काव पाँर डा डाहुवत वाज़ है दान्या डाले।

### छैव पुरूसनिकाव बरदानर

१२ अ डानैँ डामेर, परमेस्वरए छैव उपुरूसए ओयासि-ज़्याव बरदानए जूनी तोबो नेब्लो है डादाचिज़्या। २ जे ज़ जेसैँज़्या, परमेस्वरए ओपाँत जेमाहुद उमी मारैःवलाई दोरैद यालाँज़्याव मिताव जेलाई ब आरा उरू मालिज़्याव मापाँज़्याव अडग्याए ल्योदा ज़ यालाँचिज़्याव। ३ है जैद जे मिताव-रालाई आव है डादाचिज़्याव पाँ बने

ओचाहित ल्यो लिज्या। परमेस्वरए छैव उपरूसनी पाँज्याव मिँए खर्क ज़ येसुलाई 'ओफ्या·हुव' है मादोव। फरी परमेस्वरए उपरूस मादैव मिँए खर्क ज़ येसुलाई 'डाप्रभु' है मादोव।

४ परमेस्वरए ओयासिज्याव बरदानर भाँती भाँतिलावर लिज्यार। हैदी ब नो भरी तोबोका तोबो छैव परूसनी ज़ ताज्यार। ५ परमेस्वरए ओयासिज्याव येनर ब भाँती भाँतिलावर ज़ लिज्यार। नो भरी ब तोबोका तोबो गेप्रभुनी ज़ ताज्यार। ६ परमेस्वरए प्राइँ किसिमलाव मिँराए खार्ल भाँती भाँतिलाव येनर दोज्याव। नो येन भरी दोज्याव ते ओल तोबोका तोबो परमेस्वर ज़। ७ परमेस्वरए उपरूसए गेलाई ओयासिउ सु सु गेबरदानर जो मितावर यातादी ब नो भरी प्राइँए जूनी ज़ लिज्या। ८ ख्वारालाई परमेस्वरए उपरूसनी धो बुफ़िउ पाँर पलास्न्या यासिउ लिज्या। ख्वारालाई नो परूसनी ज़ सुए ज़ यामासैताव पाँर सतैदचान्या यासिउ लिज्या। ९ ख्वारालाई अचम्बलाव युँ हुपन्या सक्ती यासिउ लिज्या। ख्वारालाई नो परूसनी ज़ याजोरो हुवरालाई सगराँन्या बरदान ब यासिउ लिज्या। १० ख्वारालाई फरी अचम्बलाव येनर दान्या, ख्वारालाई परमेस्वरए उपरूसनी ओपाँ सथैन्या, ख्वारालाई चाव माचाव परूस

सरेस्न्या, ख्वारालाई परमेस्वरए उपरूसनी छुत छुत खामनी पाँन्या, ख्वारालाई नो पाँए ओअर्थ बुफ़िद पलास्दचान्या बरदानर याएज्याव।

११ आव बरदानर तोबोका तोबो छैव परूसए ओयेनर ज़। नो परूसए ज़ जो जोरालाई किताव किताव यान्या उयुँ लिज्या, हो होरालाई ज़ याएज्याव।

### परमेस्वरए उमिनतावर

#### तोबो क्याँ ज़

१२ किताव मिँए ओक्याँत उखँ उकुइर, ओर्ना उमीर प्राइँ ताज्यार, हिताव ज़ गे ख्रीसए ओक्याँतावर ब कुधु गेलिदी ब तोबो क्याँ ज़ गेताज्या। १३ गे यहूदी गेतादी ब, छुत जातलाव गेतादी ब, बाँदा गेतादी ब, माबाँदा गेतादी ब, प्राइँ तोबो परूसनी सछैसिद तोबो परूस ज़ गेदैवए प्राइँ तक्याँ ज़ गेताके। १४ ख्रीसए ओक्याँतावर तोबो वाज़ माःक, कुधु ज़ गेलिज्या। १५ किताव खँए, "डा कुइ स्यासो डामाल्योए डा क्याँत गनिसिउ डामाले," है उलिदी ब निताव पाँए ते क्याँल मागनिसिउ माताए। १६ हिताव ज़ फरी नाए, "डा मी स्यासो डामाल्योए डा क्याँत गनिसिउ डामाले," है उलिदी ब निताव ओपाँए ते क्याँल मागनिसिउ माताए। १७ क्याँत मी वाज़ उलिकिन कातानी थैन्या? क्याँत

ना वाज उलिकिन काताए सडन्या।  
१८ खाली परमेस्वरए ओल उयुंनी ज़  
मिँए क्याँताव भरी सु सु यायेन, सु सु  
यापो जैद याएक्यो। १९ क्याँतावर छुत  
छुत ओमाजैव ताकिन क्याँ कातानी  
ओतारिज़्याव? २० है जैद तोबो क्याँत  
ज़ कुधु मिनर, कुधु येनर लिज़्यार।

२१ मीए कुइलाई, “डालाई नँनचाहित  
माले,” है मादोधुव। हो मिताव ज़ डैए  
खँलाई, “डालाई नँनचाहित माले,” है  
मादोधुव। २२ भन क्याँताव मागनिसिउ  
मितावर ज़ बुरू बनै याचाहित ल्योर  
लिज़्यार। २३ फरी क्याँताव माचावल  
गनिसिउरालाई गेरासमारिज़्या,  
लाज हुव गेराथरैज़्यावरालाई भन  
क्वाए क्वाइद समारस गेरानैज़्या।  
२४ क्याँताव यासोभा ल्योरालाई  
ताकितर निताव समारस गेमरानैए।  
खाली परमेस्वरए क्याँतावर ओराजैक  
लाज हुवल गनिसिउरालाई ज़ यामान  
नैदचान्यार याजैक्यो। २५ परमेस्वरए  
घेप्पा जिम्ज़ार नितावनी ओरासखैवए  
क्याँतिन तँदा जैसिद लिन्या ओमेला ज़  
माले। बुरू प्राइँ सम सम समारिसिउ  
ताके। २६ तोबोए दुख ओदैकिन  
क्याँ भरी ज़ हुज़्या। तोबोए इज्यात  
ओदैकिन क्याँ भरी ज़ होलाँ ताज़्या।

२७ जे भरी ब ख्रीसए ओक्यारँ ज़।  
है जैद सु सु जेपो, सु सु जेयेन ब  
लिज़्या। २८ परमेस्वरए मन्दलील ब

सु सु यायेन जैद याएक्यो। प्राइँरानी  
ज़ात ओसाचीर याजैक्यो। हुकिन  
परमेस्वरए उपुरूसनी पाँन्यार  
याजैक्यो। हुकिन ओपाँ पैन्यार  
याजैक्यो। हुकिन अचम्बलाव येनर  
दान्या, याजोरो हुवरालाई सगराँन्या,  
माथैव मायोवरालाई चिऊन्या,  
चाव सल्ला यान्या सोनो परमेस्वरए  
उपुरूसनी छुत छुत खामनी पाँन्यार ब  
याजैक्यो। २९ ओसाचीर प्राइँ मातार,  
परमेस्वरए उपुरूसनी पाँन्यार ब प्राइँ  
मातार, ओपाँ पैधुन्यार ब प्राइँ मातार।  
हिताव ज़ फरी प्राइँए ज़ अचम्बलाव  
येन दान्या, ३० याजोरो हुवरालाई  
सगराँन्या, छुत छुत खामनी पाँन्या,  
नो पाँए ओअर्थ बुभिद पलास्दचान्या  
प्राइँ ज़ मातार। ३१ खाली जे प्राइँरानी  
चाव ओबरदानर खिन्त्यादा कलँ  
लिच्यो। अफ़ होकिन भन चाव तोबो  
येम सतैद डायचिरिज़्या।

### मया दान्या

१३ डा नाम नमलावराए  
यापाँ भरी डापाँधुदी ब,  
डास मया ओमालिकिन डापाँ  
भरी छ्चाल्यानी छिलिंड ताज़्याव  
छेलामए ओर्गा स्यासो वाज ताज़्या।  
२ परमेस्वरए उपुरूसनी डापाँधुदी  
ब, सुए ज़ यामासैताव माबुभिधुन्या  
पाँर डासैधुदी ब, डायुँ हबोनी हाँर



डाधलैधुदी ब, डास मया ओमालिकिन डा काता ज़ माःक। ३डास लिज़्याव भरी काता ज़ माल्योरालाई भाःद डाराएदी ब, छुतराए जूनी डाजिउ डाभाःदी ब, डास मया ओमालिकिन डालाई काता फाइदा ज़ माले।

४ओमया ल्यो मिँए ते चाव माचाव प्राइँ सहिज़्याव, उयुँ गराँव ब ताज़्या। ओलकिन ओनैए ओदैवत उमी मातूए, सघ्योःसिद मास०ए। ५ओमया ल्यो मिँए ओसोर माल्यो जबरज्यास्तीलाव येन ब मादोव, ओललाई तान्या वाज़ माखिमो, मिँराए जो है यादोदी ब माडैए, माचाव पाँर उयुँल मानैव। ६असतलाव येनर रँःद उयुँ माचाव दोज़्याव, फरी सतलाव येनर रँःद उयुँ होलाँ ताज़्या। ७निताव ओमया ल्यो मिँए उयुँ सुहुबो ज़ नैज़्याव, प्राइँत आस दोज़्याव, प्राइँ ज़ सहिज़्याव, मया दान्या खर्क ज़ मारासो।

८परमेस्वरए उपुरूसनी पाँन्या तादी ब, नो पुरूसनी छुत छुत खामनी पाँन्या तादी ब, पाँ भरी सैन्या तादी ब, नो भरी ते तछा खेमन्या लेर। खाली मया ते खर्क ज़ खेमन्या माले। ९आज्याल बनै गेसैंदी ब सैन्या भरी गेमासैँताए। परमेस्वरए उपुरूसनी गेपाँदी ब नो पाँ प्राइँ ते गेमाबुभिताए। १०खाली खेमन्या बेला उहुवत उपुर्काव पाँ भरी खेमन्या लेर।

११किताव डा ड़ादा लुज़ा डालि- ज़्याक डापाँ भरी, डाबिचार भरी लुज़ाए युँ मिताव वाज़ उलिज़्याव, बल्ल सेर डातावत वाज़ नो लुज़ा पाँर डारास्के। १२हिताव ज़ भ्यालर्या जिर्लिव धर्पन गेभाल्सिक चबनै गेडाः स्यासो मारैःए। हो स्यासो ज़ गेप्रभुए ओगेर ब ओल ओमाहुवा पै भ्यालर्या जिर्लिव वाज़ गेरैःज़्या। ओल उहुवत बल्ल गेलाई सरेस्द ओनैसिज़्याव मिताव गे ब हो छचाम ज़ ओल ओडाः रँःद चबनै सरेस्न्या गेले।

१३है जैद युँ हुपन्या, आस दान्या, मया दान्या, आव स्लोम्लो पाँ ते खर्क ज़ खेमन्या माले। फरी नो स्लोम्लोरानी प्राइँरानी घेप्पा ते मया ज़।

परमेस्वरए उपुरूसनी पाँन्या सोनो  
छुत खामनी पाँन्या

१४ जे ब प्राइँरानी ड़ात छुतए ल्योदा मया दान्यात कलँ ल्यो ताके। हैदी ब परमेस्वरए उपुरूसए ओयासिज़्याव बरदानर ब खिमन्यादा धामा दोच्यो। प्राइँरानी ड़ात परमेस्वरए उपुरूसनी पाँन्या खिमच्यो। २परमेस्वरए उपुरूसनी छुत खामनी पाँज़्याव मिँ ते मिँरास ओपाँज़्याव माःक, परमेस्वरस पाँज़्या। नो मिँए खर्क ज़ यामाथैताव पाँर छैँव पुरूसनी ओपाँवए सु मिँए ज़

माबुभिधुर। ३परमेस्वरए उपरूसनी पाँज्याव मिँए ते मिँराए जूनी ज़ पाँज्या। नो पाँए पाथ पारैव ब दोज्याव, युँलाई सभेःदद्याव ब दोज्याव, युँ होलाँ ब जैदद्याव दोज्याव। ४नो छुत खामनी माबुभिसिउ पाँ पाँज्याव मिँ ते ओललाई वाज़ बनैज्याव। परमेस्वरए उपरूसनी बुभिसिउ पाँ पाँज्याव ते मन्दली भरिलाई ज़ बनैज्याव। ५जे परमेस्वरए उपरूसनी छुत खामनी जेपाँज्याव ते चाव ज़। खाली होकिन बुरू परमेस्वरए उपरूसनी जेपाँधुकिन ताखेहो है डालिज्या। काराव ल्यो ताकिन नो पुरूसनी छुत खामनी पाँज्यावए नो पाँए ओअर्थ पलास्द ओमाराएधुकिन मन्दलीलाई माबनैधुव। नोकिन बुरू परमेस्वरए उपरूसनी पाँज्याव मिँए ओचाहित घेप्पा लिज्या।

६है जैद डानै डामेर, डा ब जेस निताव सुए ज़ माबुभिधुन्या पाँर डापाँकिन जेलाई काता ची ओतारि-ज्याव? बुरू परमेस्वरए ल्योनिकाव साःरो पाँ डापलास्धुकिन, सुए ज़ यामासैताव पाँर डासतैँधुकिन, परमेस्वरए उपरूसनी डापाँधुकिन, जेलाई डापैचिधुकिन वाज़ जेलाई तान्या लिज्या। ७किताव तपन्या बाजार ब, बाँसुलीर सारङ्गर यातप्क यार्गा घेप्पा जिम्ज़ा यामाजैकिन आव

गित ओल्यो लिन्या माथःरैसिधुइ। ८लरैँ दान्या भाःसिन्याए जूनी भोकर तपज्यावए चावस ओमातप्किन सिपाईराए आवए उजूनी ओल्यो लिन्या कै जैद यासैरिज्याव? ९हो मिताव ज़ जेयाःनी प्राइँए बुभि-धुन्या पाँ जेमापाँकिन, 'आव ज़ ओपाँज्याव ओल्यो' लिन्या सुए ची ओसैरिज्याव? नो जेपाँ ते बतासए ओलाँव मिताव ज़ ताज्या। १०आव मानुवाताव मिँराए सु सु याखामर कुधु किसिम ज़ लिज्यार, खाली ओअर्थ माल्यो खाम ते माले। ११हैदी ब डा डापाँ नोए ओमाबुभिकिन, नोए ओपाँ डा डामाबुभिकिन ओल काताडाव डा काताडाव मिताव ज़ गिन्ताज्या। १२है जैद परमेस्वरए उपरूसनिकाव बरदानर खिमन्यादा वाज़ युँ जेदोज्यावए जे ब प्राइँरानी डात मन्दलीलाई बनैन्या बरदानर खिमच्यो।

१३है जैद जोए परमेस्वरए उपरूसनी छुत खाम ओदोकिन होए 'नो पाँए ओअर्थ ब पलास्धुन्या बरदान डादैक' लिद परमेस्वरलाई ओपोँखारिउक। १४डा छुत खामनी डापोँखारिज्या ल्यो ताकिन नो डापुरूसए पोँखारि-ज्याव, खाली डाबुद्धी ते माचलिए। १५हिताव ताकिन कातानी दान्या लिक ते, डापुरूसनी डापोँखारिकिन

डाबुद्धीनी ब डापोंखारिज्या, डापुरूस-  
नी गित डागैकिन डाबुद्धीनी ब  
डागैज्या। १६ मानी जेपोंखारिक  
माबुभिधुन्या पांणी धन्याबाद चरैःद  
परमेस्वरए उमिन बनै ज़ ओथास्क है  
जेलिकिन, नो पां माबुभिधुन्या मिंए कै  
जैद जेपां जोदर्चाद, “हैज़ ओताक,”  
है उलिरिज्याव? १७ निताव जेपांणी  
धन्याबाद चरैःन्या ते जेचरैःज्याखेहो,  
खाली नो माबुभिधुन्या मिंलाई ते  
फाइदा माले। १८ निताव छुत खामनी  
पांन्या बरदान जेकिन डास भन कुधु  
लिज्या। होए जूनी परमेस्वरलाई  
धन्याबाद ब डाचरैःज्या। १९ हैदी ब  
मन्दलील यादुप्सिक माबुभिसिन्या  
खामनी दस हजार गोता पां पांज्याव  
देखा, पांच गोता तादी ब प्राइंए  
बुभिन्या खामनी ज़ डापांरिज्या।

२० अ डानै डामेर, जे निताव पां  
सैन्यात भाउज़ा स्यासोर ताताच्यो।  
माचाव येनत वाज़ भाउज़ा मितावर  
ताच्यो, बुद्धीत फरी छिबोर ताच्यो।

२१ धर्मसास्त्रल इताव सर्सिउ लिज्या,  
परमेस्वरए है लिज्या, “डा जेलाई  
तादाडावराए यायाःनी,  
याखाम जेमाबुभिधुज्यावराए  
ल्योनी,  
डापां डासथैचिरिज्या।

हितावत ब डापां थैद ज़  
यान्या जेमाले।”

२२ निताव माबुभिधुन्या पांर  
परमेस्वरए ओपां भैःज्यावराए जूनी  
ते माःक, माभैःज्यावराए जूनी सरेस  
लिज्या। फरी परमेस्वरए उपुरूसनी  
पांन्या ते ओपां माभैःज्यावराए जूनी  
माःक, भैःज्यावराए जूनी लिज्या।  
२३ है जैद मन्दलील जेदुप्सिक जे  
प्राइंए परमेस्वरए उपुरूसनी सुए ज़  
माबुभिधुन्या पांर जेपांक, नो बेलक  
परमेस्वरए ओपांत माहुवर मासैतावर  
नक यालिकिन, “आवर ते बूलिउर  
ची सा,” है मालेर रो? २४ खाली  
प्राइंए परमेस्वरए उपुरूसनी जेपांक  
परमेस्वरए ओपांत माहुवर मासैतावर  
नल याहुकिन नो जेपांए याक्यांलाई  
जांचिद, “गे ते पापीर ची गेल्यो,”  
लिन्या थःरैन्या लेर। २५ हो ताकिन  
नोराए यायुंलाव पांर छर्लङ्ग रंःद नामक  
फुलुप्सिद, “परमेस्वर ते आवरास  
ची उलिज्याव ओल्यो,” लिद या ब  
परमेस्वरए ओसेवा दान्या लेर।

### दुप्सिकाव येन

२६ डानै डामेर, जेदुप्सिक जे  
कितावर ताव परिके लिक ते,  
जेस ख्वार भजन गैन्यार, ख्वार पां

पैन्यार, ख्वार परमेस्वरनी साःरो पाँ सतैसिउ पलास्न्यार, ख्वार परमेस्वरए उपुरूसनी छुत खामनी पाँन्यार, ख्वार नो पुरूसनिकाव पाँर पलास्न्यार जेलिकिन, नो जेपाँ भरी प्राइँलाई तान्या ओताक। २७ परमेस्वरए उपुरूसनी छुत खामनी पाँन्यार यालिकिन नेब्लो सोम्लोराए वाज़ ओपाँरक, हो ब तखेप्त माःक, पालास पालास ओपाँरक। नोराए यापाँ फरी तोबोए पलास्द ओरायोक। २८ नो पाँए ओअर्थ पलास्धुन्यार यामालिकिन नो पाँज्याव मिँ मन्दलील चिम दाद उलिक। उयुँल उयुँल वाज़ परमेस्वरस ओपाँक। २९ परमेस्वरए उपुरूसनी पाँज्यावर ब नेब्लो सोम्लोए वाज़ ओपाँरक। उपुर्कावराए नो पाँर थैद ओथःरैरक। ३० नो थैज्यावराए खार्नी फरी तोबोए परमेस्वरए उपुरूसनी साःरो ओचाहित ल्यो पाँ ओदैकिन नो डादाडाव पाँज्यावए चिम ओदोवक। ३१ इतावनी ज़ परमेस्वरए उपुरूसनी पाँज्यावर पालास पालास ओपाँरक। हो ताकिन ची नोराए यापाँ थैज्याव भरिए परमेस्वरए ओयेनर सैद यायुँर भेःन्या ले। ३२ परमेस्वरए उपुरूसनी पाँज्याव मिँए परमेस्वरए उपुरूसनी मापाँद ज़ मातान्या ते माले। ३३ काराव ल्यो ताकिन परमेस्वर अलमल जैज्याव माःक, ओयेन भरी मेलास ज़ लाँज्याव।

पो पोड परमेस्वरए उमिनताव लिज्यावराए मन्दलील यादोज्याव मिताव, ३४ जे ब जेदुप्सिक जेसकाव मेंमार भयाउँ भयाउँ मालिद थैद ओनैरक। नोरालाई पाँन्या यासिउ माले। धर्मसास्त्रलाव सर्सिउ मिताव यारेराए पाँ धूँल उलिरक। ३५ नलाव पाँर तोबो नेब्लो यामाबुफिधुकिन याफिमक यारेरालाई है ओरादोरक। मन्दलील मेंमार निताव भयाउँ भयाउँ लिन्या लाज हुव लिज्या। ३६ सैं परमेस्वरए ओपाँ जे जेल्योनी सुरू ओताव? सैं परमेस्वरए ओपाँ जे वाज़ दैद जेनेज्याव?

### तुपैन्या पाँर

३७ जोए ‘डा परमेस्वरए उपुरूस-निकाव बरदानर दैव डालिज्या, ओल उपुरूसनी ब डापाँधुज्या’ है उलिकिन नो मिँए आव डासरो पाँ ब परमेस्वरए ल्योनी हुव ज़ ओल्यो लिन्या ओथःरैवक। ३८ ओमाथःरैकिन ओललाई ब परमेस्वरए थःरैन्या माले।

३९ है जैद डानैं डामेंर, जे प्राइँरानी डात परमेस्वरए उपुरूसनी पाँन्यात कलँ ल्यो ताके। फरी परमेस्वरए उपुरूसनी छुत छुत खामनी पाँन्या ब तावैच्यो। ४० खाली जेदोज्याव भरी तहस मेलास दाव ताके।

पावलए डादाकिन ज़  
ओरासथैज्याव पाँ

**१५** अ डानैँ डामेर, डासथैचिउ परमेस्वरए चाव ओथा फरी ब तोबो नेब्लो दोहोरैद डायचिरिज्या। जे नो पाँर तीद आःपै नत ज़ जेलिज्या। २फरी नो डासथैचिउ पाँ साचो ज़ जेयुँल जेरैव ताकिन नो पाँलाई मारास्द ननी ज़ जेबाँचिरिज्या। मानी ते अनाकल ज़ जेयुँ जेसुहुप्के।

३डा जेलाई डासथैचिक प्राइँरानी ओचाहित ल्यो डा डादैव पाँर जेलाई ब डायचिके। नो पाँर आवर ज़ — धर्मसास्त्रल डादाकिन सर्द यानैज्याव मिताव ख्रीसए गेपापए जूनी उजिउ भाःदयासिक्यो। ४नकिन नोलाई यागादैव सोलात सैसिद सोके। नो ब धर्मसास्त्रल डादाकिन ज़ सर्सिउ उलिज्याव। ५ओसोव छीनी पत्रुसए ओडाक सरैःसिके। हुकिन बाह जना ओसाचीराए याडाक ब सरैःसिके। ६नकिन तखेपत ज़ पाँच सयकिन यादाडाव ओपाँत बाज्यावराए याडाक सरैःसिके। नो रँःज्यावर ख्वा ख्वार आःपै लिज्यार, ख्वार सिधुकेर।

७हुकिन याकूबए ओडाक सरैःसिके। हुकिन फरी ब तखेप ओसाचीराए याडाक सरैःसिके। ८प्राइँरानी छींत डा ओमास मायोःद जर्मिउ<sup>†</sup> मिँ मितावए डाडाक ब सरैःसिके।

९ओसाची भरिनी प्राइँरानी जिम्ज़ा डा ज़। परमेस्वरए ओमन्दलीए उखिरी पसिद दुख डायोए ओसाची है लिन्या स्यासो ब डामाले। १०खाली डाल्योदा परमेस्वरए उयुँ ओगराँवए ओल ओसाची ब जैनाक्यो। डाल्योदा उयुँ गराँद ओयाँव येनलाई फिस्को माजैद ज़ डादोज्या। उपुर्काव उसिसराकिन प्राइँरानी धामा डा ज़ डादोके। खाली नो दोज्याव डा माःक, परमेस्वरए डाक्याँताव ओयाँव ओल ओअसिकए ज़ डादोके। ११है जैद डा तादी ब, नोराए तादी ब, गे गेसथैचिज्याव पाँ तोबो ज़, जेयुँ हुण्ड जेरैव मनी हो ज़।

सिद सैसिन्या

१२तोबो गेसथैचिज्याव पाँ आव ज़, ख्रीस सिउनी सैसिद सोके। जे ख्वा ख्वाराए फरी कै जैद “सिद सैसिन्या माताए,” है जेलिज्याव? १३सिद

<sup>†</sup>१५:८ ओमास मायोःद जर्मिउए ओअर्थ — ख्वा ख्वा मिँराए पावललाई प्रभुए ओसाची ताया लिन्या यामाचेतैज्याव।

सैंसिन्या ओमाताकिन ख्रीस कै जैद सिद ओसैंसिउ? १४ ख्रीस सैंसिद ओमासोव ताकिन गे गेसथैचिज्याव पाँ भरी ब अनाकलाव ज़ ताखेहो, जे जेयुँ उहुबो मनी अनाकलाव ज़ ताखेहो। १५-१६ गे ते भन परमेस्वरए ओपाँताव साची गेयेनल पाजीर ज़ गेथरिखेहो। जे जेपाँ मितावनी सिउर खर्क ज़ मासोन्या ताकिन ख्रीस ब मासोखेहो। निताव जेपाँए फरी ख्रीस ओमासोकिन गे परमेस्वरए ख्रीसलाई सिउनी सोचोइक्यो है गेलिज्याव पाँ परमेस्वरकिन तँदाडाव पाँ ज़ ताखेहो। १७ फरी ख्रीस सिउनी ओमासैंसिउ ताकिन जे जेयुँ जेसुहुबो अनाकलाव ज़ ताद आःपै जेपापए सजा धूँल ज़ जेलिज्या। १८ ख्रीसए उमिनताव सिउर ब सिउका सिउ ज़ ताखेरहो। १९ गे ख्रीसए ल्योदा गेयुँ गेसुहुपुज्याव आस आव गेक्याँत वाज़ ओताकिन आव मानुवाताव प्राइँरानी भुकिउर युँ नावज़ार गे ज़ गेताके।

२० खाली ख्रीस सिउनी मासैंसिए लिन्या सङ्गा ज़ माले। ख्रीस सिउनी सैंसिज्याव भरिराए गेडाताव ज़ ताके। २१ तोबो मिँए ल्योनी ज़ सिन्या सजाल बान्या ताके, फरी नो सजानी पुलुस्द अजम्बरी जुनील बान्या ब तोबो मिँए

ल्योनी ज़ ताके। २२ किताव आदमए ल्योनी प्राइँ सिन्याल परिकेर, फरी ख्रीसए ल्योनी प्राइँ सैंसिन्या लेर। २३ खाली सु सु पाला लिज्या। प्राइँरानी डात ख्रीस सैंसिके। हुकिन ओल फरी उहुवत उमिनताव सिउ भरी ब सैंसिरिज्यार। २४ नकिन प्राइँ खेमन्या बेला ताज्या। हो बेलाक नाम नमलाव हकर सक्तीर ओपोःस ज़ खेमद ओल ओराज्या वाज़ रहिन्या ले। नो राज्या ओबाबु परमेस्वरए उकुइत सँपिन्या ले। २५ खाली उसुतुररालाई उखँ धूँल ओमाराभाःवा पै ओराज्या ओल ज़ चलैन्या ले। २६ प्राइँरानी छींत ओखेम्रिज्याव उसुतुर ते 'सिन्या सजा' ज़। २७ धर्मसास्त्रल ब इताव सर्सिउ लिज्या,

“परमेस्वरए प्राइँ ख्रीसए उखँ धूँल यानैरिज्याव।”

खाली नो पाँल “प्राइँ” है उलिदी ब ख्रीसए उखँ धूँल नैदयाज्याव परमेस्वर ओल ते ख्रीसए उधूँल ते माले। २८ नो भरी प्राइँ ख्रीसए उधूँल याताव प्राइँना ओल ख्रीस ब ओबाबु परमेस्वरए उधूँल ज़ तारिज्या। हाःकिन ओजाए धूँल प्राइँ नैदयाज्याव परमेस्वर ओल ज़ प्राइँए डैताव तारिज्या।

२६ जे है जेलिज़्याव मिताव सिउ मिं खर्क ज़ सैसिद मासोए लिन्या साचो ज़ जेथःरैज़्याव ताकिन ख्वा ख्वार काराव परमेस्वरए ओपाँ माथैदकाव सिउ मिंलाई परमेस्वरस सखैन्याए जूनी नो सिउए उजूनी यासछैसिज़्याव? ३० सैसिद सोन्या साचो ओमालिकिन, गे ओपाँ सथैज़्यावर काराव इताव ओछ्यास ल्यो येनल लिन्या? ३१ साचो ज़, डानैँ डामेंर, गेप्रभु येसु ख्रीसए ओडाक जे जेजूनी ड़ासुनी च्याँ:सिउ उलिज़्यावए है ड़ालिज़्या — ड़ा दिनकाव ज़ सिन्या स्यासो छ्यासल ड़ाबाज़्या। ३२ ड़ालाई एफिससल ला मितावराए याज्याम्हुनाक ड़ा ड़ायेन मिँए ओयेन मिताव वाज़ ताकिन ते निताव दुखर सहिद ड़ालाई काता ची ओतारिज़्याव? गेजूनी सिउनी सैसिद सोन्या ओमालिकिन काताए जूनी निताव दुखर सहिन्या? बुरू, “ज़्याद ओद थॉतस लिकिन ताया, परा:तीदा सिन्या लिज़्या।” ३३ इताव पाँरानी जोगोइसिद लिच्यो। निताव पाँ दोज़्यावरास जेबारिकिन जे ब बलेस्न्या जेले। ३४ परमेस्वरए उमिनतावरालाई ज़्यास्न्या पाँर थःरैद जे ब नो जेदोज़्याव पापर रासो ताके।

जे ख्वा ख्वार आ:पै परमेस्वरलाई मासरेस्ज़्याव मितावर जेलिज़्या। निताव येनत जेलाज माहुज़्या?

### फरिकाव गेक्याँ

३५ जे ख्वा ख्वारए है जेलिज़्याखेहो, “सिउ मिं कै जैद फरी सैसिद ओसोरिज़्याव? नो किताव क्याँस उहुरिज़्याव?” है ब जेलिज़्या। ३६ काता जेपाँज़्याव निताव? जे ब धुर जेभा:क नो धुर ओमासिवा पै सा:रो मापत्करिए। ३७ फरी नो गम जील जेभा:व धुर ताम तादी ब, जो तादी ब, नो सा:रो हुन्याए ओक्याँ ते जेमाभा:ए, नाडग्या ओगेदा वाज़ जेभा:ज्या। ३८ परमेस्वरए नो धुरलाई किताव क्याँ जैदचाव ओपैँज़्याव हिताव ज़ जैज़्याव। सु सु याधुर सु सु याक्याँ ज़ जैद याएज़्याव। ३९ क्याँताव स्या ब छुत छुत ज़ ताज़्या। मिँए ओस्या छुत ज़, बनलाव स्याराए स्या छुत ज़, बाज़ाराए स्या छुत ज़, ड़ाँ:राए स्या ब छुत ज़ ताज़्या। ४० आव मानुवातावराए याक्याँ भरी छुत ज़ ताज़्या, स्वर्गतावराए याक्याँ ब छुत ज़ ताज़्या। याजोबन ब सु सु याजोबन ज़ ताज़्या। ४१ हो मिताव ज़ निमीए ओज़गै ब छुत ज़, स्यावैए ओज़गै ब

छुत ज़ ताज़्या। सोरोराए याज़गै ब छुत  
छुत ज़ ताज़्या।

४२सिउनी सैसिद सोवर ब  
हिताव ज़। चिन्या क्याँ गमल  
गेभाःज़्या, मासिन्या क्याँ परमेस्वरए  
सोचोइज़्याव। ४३ओजोबन माल्यो  
गमल बाज़्या, ओजोबन ल्यो  
हुज़्या। ओर्सा खेमो गमल बाज़्या,  
बनै ओर्सा ल्यो हुज़्या। ४४नो गमल  
बाज़्याव मानुवाताव क्याँ ज़, ननी  
हुज़्याव स्वर्गताव क्याँ ज़। गे किताव  
मानुवाताव क्याँ गेदैज़्या, हिताव  
ज़ स्वर्गताव क्याँ ब गेदैरिज़्या।  
४५धर्मसास्त्रल ब इताव सर्सिउ लिज़्या,

“प्राइरानी डाताव आदम  
उस० ल्यो मिँ ताके।”

प्राइरानी छींताव आदम† फरी  
अजम्बरी जुनी याज़्याव पुरूस  
ज़ ताके। ४६ननी ज़ रैःज़्या, गम-  
निकाव क्याँ डात ताके, नकिन  
बल्ल परमेस्वरए उपुरूसनिकाव  
क्याँ ताज़्या। ४७उस०कताव मिँ  
आदम गमनी जैसिउ मानुवाताव  
ताके, छींनीकाव मिँ खीस स्वर्गनी  
हुके। ४८गमनी तावए ओथोर गम  
मितावर ज़ ताज़्यार, स्वर्गनी हुवए  
ओथोर स्वर्गताव मितावर ज़ ताज़्यार।

४६सोनो गे किताव गमनिकावए  
उसुरूप गेदैव, हिताव ज़ स्वर्ग-  
निकावए उसुरूप ब गेदैरिज़्या।

गमे क्याँस परमेस्वरए ओराज्याल  
गेमापसिधुइ

५०अ डानैँ डामेर, आव पाँ ब सैच्यो,  
गे आव मानुवाताव गमे गेक्याँस  
परमेस्वरए ओराज्याल गेमापसिधुइ।  
आव गेक्याँ खेमन्या म्नाल्याल वाज़  
गनिसिउ लिज़्या। निताव क्याँस खर्क  
ज़ माखेमन्या जुनील माबासिधुइ।  
५१जेलाई तोबो म्मोसिउ पाँ सतैँद  
डायाचिरिज़्या — गे प्राइँ गेमासिदी ब  
प्राइँए गेक्याँ तोसिरिज़्या। ५२खेमन्या  
बेलाकाव भोंकरए ओर्गा ओथासो  
प्राइँना गे उमँःजानी मी चिकलामत  
ज़ गेक्याँर तोसिरिज़्या। नो भोंकरए  
ओर्गात सिधुवर ब खर्क ज़ मासिन्या  
जुनील सैसिद सोरिज़्यार। ५३आव  
खेमन्या म्नाल्याल बाज़्याव गेक्याँ  
सोनो सिधुवराए याक्याँ ब खर्क ज़  
मासिन्याल ओमातोसिवा पै माताए।  
५४नो खेमन्या म्नाल्या भरी खर्क ज़  
मासिन्याल ओतोसिउ प्राइँना ज़  
धर्मसास्त्रलाव सर्सिउ पाँ यो-न्या ले।  
नलाव सर्सिउ आव ज़,

† १५:४५ प्राइरानी छींताव आदमए ओअर्थ — खीस।

१५:४५ उत २:७



“ओल परमेस्वर ज़ भें:सिद,  
सिन्यालाई हारैद नैव।”

५५ “अब ते सिन्या सजा,  
नमिन ज़ फ्याःके,  
नसक्ती ब माके।”

५६ सिन्या सजा पापनी ज़ ओसक्ती ल्यो ताके। पाप फरी परमेस्वरए ओजैव कानुननी ज़ ओसक्ती ल्यो ताके। ५७ हैदी ब परमेस्वरलाई धन्याबाद लिज़्या, ओल गेप्रभु येसु ख्रीसए ल्योनी ज़ निताव सजानी पुलुस्न्या येम ब जैदयासिक्यो। ५८ है जैद डायुंलाव डानैं डामेर, जे ग्याल गिल माताद थरिद एकतार ज़ गेप्रभुए ओयेन दाव ज़ नैच्यो। जे ब जेसैंज्या, गेप्रभुए उजूनी जेदोज्याव भरी जेलाई अनाकलाव तान्या माले।

पावलए यरूसलेमदा लाँव  
ओपैंज्याव भिती

१६ परमेस्वरए यरूसलेमलाव छैँव उमींरालाई भिती दुप-दयान्याए जूनी डा गलातियालाव मन्दलीरालाई है डारादोज्याव मिताव जे ब दोच्यो। २ साताकाव तखेप उसकताव छचाम सु सु जेधुवाकाव दुप्द नैच्यो। डा डाहुवत स्योःन्या ताताक। ३ डा डाहुवत नो जेदुपो

भिती यरूसलेमदा लाँन्याए जूनी सु सु जेराखतैरिज़्याव डा नोरालाई कागतर सदर्याद डारापरीरिज़्या। ४ डा ब बाव परिन्या स्यासो ओताकिन नोरास डाबारिज़्या।

हुन्या बन्दोबस्तर

५ डा जेल्योदा माहुद डादा माकेदोनियालाव मन्दलीरालाई दैना डाबाज़्या। नोरास डादैसिउत वाज़ जेल्योड हुन्या डाले। ६ डाहुवत जाँवा जेस डालिरिज़्या, ओताकिन युँदा भरी ज़ डालिरिज़्या। हो ताकिन ओल्द डाबाक डालाई जाँ जाँ जेसघैनाए सैं है डालिज़्या। ७ फरी जेस निताव तछा नेलाए जूनी काता दैसिन्या है ब डालिज़्या। खाली परमेस्वरए जोरैद ओयाँकिन जाँवा पै जेस ल्यो डादैकिन ताखेहो है डालिज़्या। ८ खाली नो पेन्तिकोस पब ओमाहुवा पै आल एफिससल ज़ डालिरिज़्या। ९ आल परमेस्वरए ओपाँ वैंज्यावर कुधु ज़ यालिदी ब डालाई परमेस्वरए ओपाँ सथैन्या घ्योःव मौका जोरैद नैदयाँव।

१० डा डामाहुद डादा जेल्योड तिमोथी उहुकिन नोलाई उयुँ आँचा पाँचा जैद मायाद पाथस नैच्यो। नो मिँ डा स्यासो ज़ गेप्रभुए ओयेन चावस ज़

दोज़्याव। ११ है जैद नोलाई सुए ज़ तासोरक। बुरू नोलाई चावस सघैद डाल्योदा परीदचाँच्यो। डा नोलाई ओलस बाव ओनैरास ओयेम चिऊव ज़ डालिज़्या। १२ गेभाइ अपोल्लोस-लाई नोरास जेल्योदा परीन्याए जूनी बनै कर डालैक ते आथ पाला भैः ज़ माभैःके। ओताबोत जुनी ब हुन्या ले।

### सम्जैन्या पाँर

१३ जोगोइसिद लिच्यो, जेयुँ जेसुहुबो पाँत थोरिद लिच्यो, माछे-द घ्योःव युँ जैद लिच्यो। १४ जेदोज़्याव येन भरी मयास दोच्यो।

१५ अ डानै डामैर, डा स्तिफनास सोनो उक्किमलावराए जूनी तोबो है डादाचिज़्या। जे ब जेसैज़्या, अखैया खन्दलाव प्राइरानी डात परमेस्वरए ओपाँत हुवर नोर ज़। नोराए परमेस्वरए छैव उमीराए यासेवा दान्यात ज़ याजिउ यायुँ भरी भाःद नैर। १६ है जैद जे निताव मिँराए याधूँल लिद यापाँ भैःच्यो। नोरालाई वाज़ माःक, परमेस्वरए ओयेन धामास दाज़्याव भरिलाई ब यामान नैद याराएच्यो।

१७ स्तिफनास, फोर्तुनातस सोनो अखाइकसर जे जेल्योनी याहुक डा बनै डारेंके। जे जेमालिकाव स्याँब्या स्योँबे नोराए पुरा जैदचाँकेर। १८ जे जेयुँर होलाँ जैद यायाचिउ मिताव डा डायुँर ब होलाँ जैदचाँकेर। है जैद निताव मिँराए यागुन तामेंःच्यो।

### जेरो दान्या पाँर

१६ एसिया खन्दलाव मन्दलीराए जेलाई जेरो है दाचिज़्यार। अकिलास सोनो प्रिस्किलानिस निक्किमकाव दुप्सिज़्याव मन्दलीए ल्योनी ब 'प्रभुए उमिननी बनै बनै जेरो लिज़्या' है दाचिज़्यार। २० आडाव दाज्यु भाइ भरिए ब जेरो है दाचिज़्यार। है जैद जे जेल ब मयासं जेरो दासिच्यो।

२१ आव चिथीत डा पावलए डाकुइनिकाव दस्कत ज़ भाःद डानै, सरेस्च्यो। २२ जोए उयुँ गेप्रभुए ल्योदा माले, होलाई सराप ओलागिस्क। अ प्रभु, चाँदो ज़ घुहुनी। २३ गेप्रभु येसुए उयुँ जेल्योदा ओगराँक। २४ येसु ख्रीसनी मया डादाचिज़्याव जेक्याँत ओरेंःक। [आमेन]